



09972

明李應昇著

答劉康谷父母

老父母水心卓識掃清衙蠹既使區書無所容其那移則錢糧清使差馬不得下鄉則貧民安歌頌已遍窮鄉矣今所亟望舉行者革信地快手使雞犬夜甯免廟寺村墟時聞甲拷之聲爲第一義其他惠澤自次第均沾神君妙用非迂拙所能仰贊萬一至官戶之糧敝邑較爲獨少從前掣肘在胥吏侵漁數千似不獨在此項但未能先完以爲民倡是用愧心若老父母寬而漸督之如舊例以十限爲率則治生輩斷不敢獨作頑民也其官簿少載老父母已洞察之但流水簿每晚收進貴衙不落吏胥之手則洗改路窮目無他弊此亦老父母明見所及不須更贅也謹此以復明問再

乾坤正氣集

卷三百二十

一

諭黃冊紙張乃紙店事豈敢以冒罔利之譏倘有以此干瀆者必屬假冒統望以三尺懲之非地方公事愚父子素不與聞非面請札陳知老父母必弗垂聽也辱下問之雅敬布腹心

又

再領台誨神肺爲清老父母留心民瘼如置赤子於懷啼饑號寒撫摩備至今農夫野叟所喁喁而望者惟是農忙舊例百年相沿每至五六月催科勾提悉從停止往牒具在萬口同然卽或功令森嚴徵檄火迫老父母實有仰屋之嘆然爲民父母首重農時民亦有心決不忍負勿以從來相守之善政頓自今年廢之以爲後日口實也老父母若單摘欠多不及五分者另示提比則奸頑知警仁義並行卽使官戶不在農忙之例治生輩亦甘之矣鹽臺公祖觀風試計藻鑿之下奸嫗已分家兄應良卷似勝前時兩試



不審可得特拔否冢弟應星已蒙注念又前所面懇表妹夫夏寶忠傑識英詞名駒汗血尤家姑丈諸子婿中之超異者各以其卷附求破格之拔陳幽風而歌樸械知愷悌君子必異於聽矣媿媿不罪

又

向以農事仰乞神慈雖蒙寬及旬日已不啻三時甘霖矣葑菲不遺可勝感佩做邑諸生旣幸進而教之竊於兩題中窺老父母明德新民之學本之于無慾之剛夫無慾而要之以止至善則亦無倦之說也做邑之民沐浴仁化詎有量乎一二社友向從都下時先懇垂青皆素屬人望非阿私所好至家兄家弟已辱收之門牆老父母文章宗匠應垂隻眼之觀又不敢內舉爲避矣仰體憐才之念雖私實不廢公想不以瑣屑爲罪

乾坤正氣集

卷三百二十

與魏仲雪

二

孟春初得兄前歲冬仲之札并惠敘言恍然相對者久之是後奔走半年始得脫手六月入里七月北上十一月假還一年之中往返數千里都不得有白門使人逼一音耗今春之季過虞山晤叔子知兄已持籌關上竹頭木屑中應不減雅人深致耶弟前歲亦曾強與兩月是時爲初清宿穢力洗惡聲不似部關安而不貧然知居此者口眼手足一刻不到則百竄叢之凡所爲商患者非官而左右市儈之類也要惟勤而清而恕足以消之可以造福可以長譽否則惡聲蒙之不可不畏也兄素心密理下悉苦甘不須弟囑而見今可申忠告者正不得外此要著也弟以懶而澹之性乃居是非風波之場將爲容容免咎乎將爲矯矯博名乎將順流而安波乎將迴瀾而樹幟乎將趨炎而效顰乎將占風而望影乎度

皆兄之所不許也甯拙而直毋曲而逢吾黨有人心期末改落落之素其甯敢負同志乎雖然已陳之唾拾之無益孰爲方今第一勝算急宜建白者乎孰爲方今第一人才急宜推轂者乎孰爲方今未發之邪急宜鋤斥者乎孰爲往時未平之案急宜糾正者乎兄之助我應在此不當以煦煦套語塞長箋也憶往時吾輩氣韻之投每每率然而合今亦各各不羣兄與孟旋超然于木末亭畔讀書悟道飲酒賦詩何其樂而達也相與者何人最深韻可以託契最堅凝可以託盟最饒經濟留心時務又有何等奇奇怪怪宜微知之者此非燒燭夜對不可了然相晤尙遙從此以筆札爲面語耳兄俸已幾何時可及學僉之格後來之秀英英逼人弟曰在簿書中溷攘錯過兄居住來之衝過者如織亦儀封之隱觀人之會也倘留意乎弟以八月杪北行嗣後當在長安通問矣拙刻

乾坤正氣集

卷三百十

三

一冊白鹿志一冊則弟別來功課也兄詩當益富有新刻本可惠幾帙音問久濶不覺覩縷邸報中事皆兄所悉故亦不一筆及之以聞所未聞爲急耳

候周老師

恭惟老師至情純孝體道含真以居憂讀禮之餘沛扶危定傾之用凡今之門戶重而君父輕情面重而紀綱輕者則惟禮可以己之老師靜觀極詣資深逢原弟子他年亦何能仰窺萬一乎竊于今日而預賀之也向者伏承架誨務養和平敢佩終身不違參倚然何以免翹翹之嫌而仍不蹈容容之諂何以洗塞白之套而稍無負建明之思孰爲時事第一義孰爲時才第一事老師武庫之所森羅夾袋之所儲蓄幸以千百之一告之斯則老師終始造就如天至德乎湯門生遂來竊鈇之疑竟遭投杼之患彼人信賤役

之議將何以爲剖白之路此又某所憤懣而欲請者也

與夏緘庵

諱焯南康守

康郡寒瘠乃多伏莽官其地者甚費心力矧台丈當上下修隙之會事事大費幹旋總之堤工若成原是陰功無量又不特前人未了之局爲重矣白鹿名區傳是紫陽吾輩爲培植人才計率而由之亦復何罪近聞有厲禁而摧殘之者不佞弟夢寐不忘且須昌言於口朝若地方調護終藉大力耳

與熊青嶼

諱德陽

不佞弟待罪仙鄉經愚無似信心而往貿貿何知地方既有遺蘊世法又復如夢自謂不足比數久矣猥藉明公鑒其素拙逢人說項貴鄉諸公從而倡和之遂使駑馬昂首同驅飲水思源其何敢昧憶自江州晤別半載之間輒復紛紛直道不容名賢去口國虜乾坤正氣集

卷三百二十

四

憂方大口國是誰持雖幸正氣之未衰亦慮羣陰之尙伏邇者賜環之詔屢下知口聖主不靳轉圜臺下其脂車以須爲世道計終不忍鳴鳳獨居空谷也不佞弟需次尙遙暫還故里茫茫迷路特乞指南託在同心想不辱外長君次君希道寤思

與戚司理

諱良史南康司理

匡城如斗湖山接席真成吏隱名區如不佞之疎冷者宜藏拙焉何意高賢亦復至止輒令人有糠粃在前之嘆李官操人生死關人進退不以地分局也門下大才其以矜慎行之賢者倘有同心乎衙齋清況正堪神往招五數楹冷風以構向有小銘懸之北牖若能爲不佞勒銘詞于石壁中者亦拜德之一也白鹿主盟李署專責幸毋多讓諸士被摧折者望與夏緘老昌言爭之已悉之緘老札中不再贅

與門人余未之

行時備承繼卷至今念之茲以萬兄遠來稍悉近况靈山會上應多筆底蓮花若以塵趣往者卽非所望也白鹿遂有魔劫僕愧無金剛刀然終須爲吐一言幸語諸兄無爲悵悵佳稿刻就希惠幾帙

與陸景鄴

南九道諱夢龍

長安悠悠忽忽局面人情互相牽顧遼事都置度外黔蜀亦若夢中因念國家欲得真心任事如台臺者宇內甯復有兩今地方興釐旣已畢舉饒南守備一設保障尤喜有資而兵政易弛匡人習情時有細人好造浮議以圖修怨於袁九際而欲盡翻其兵案者台臺霜鏡在上飾武是先固無容其逞然未嘗不日夕伺隙也某從前諸案乖謬固多而矢公矢慎不敢徇囑託爲喜怒則可質之乾坤正氣集

卷三百二

五

白日至潯陽庫藏交盤尤極清楚恐庫吏過後作奸借口諉託則乞霆斷主持之其他地方利病無煩多贅要亦眷戀明德不覺叨叨耳

答程都昌

都爲囂敞邑治者數多傷指獨門下快才遠識勤恪自將下車伊始輒得其綱不佞向以卓異推言之上下聞而今循名蔚然千里神慰夫訟易理通易清所難者一片冰心遊方之內毋遊方之外耳以門下之品之才兢業以持之終始不貳都邑從此其爲善國乎門下勉之矣

與白彭澤

諱紹光

彭澤有先賢勝跡可鳴琴治也近者盜張政弛百蠹叢集故特借神君整頓之計妙手精心處處迎刃且改觀譽當益起縣之前

令多受鑿垣之警非必多藏誨之乃縣之猾賊黠吏通謀布置假此脅息縣君耳聞衙後墻可跨越似宜峻防又有一二大窩窟穴城中者徹縣劉父母知之極真可密問之而擊之之法須計之陸景老毋漏風聲反受蠱毒也在台丈卓識通方知必裕如恃在親知故叨叨耳貴治兩番觀風試悉不佞與目其一等中者乞查其名而獎進之併示區區文字之誼然不必假借以他事也

答周綿貞公祖

日以莪莪申候弗蒙麾納反辱批答愷至益乎披淑氣而依朗炤也道誼之篤海內正人共仰泰山北斗某亦何敢自外愧聞識疎才無當提誨耳舟次錫山再沐翰貺台意殷渥何以克承敝郡孫淇翁某之太座師也淵源有自竊所仰依若其居鄉之清介立朝之不阿著有節槩詎能以黑爲白乎此自台臺一流人何□□乾坤正氣集卷三百一十

六

一切指迷啓暗均望明誨而辱教之

答程都昌

承教具感雅意然地方共事藉庇已多正不在世法稠疊也惠儀附壁并謝惓惓都昌多口之地往往不風而波惟寬嚴交濟冰霜自持省差役清衙敞以門下神明之才出之裕如耳臨別贈言想能原其意也

與吳生白

諱中偉粵東僑司

四方多事粵東晏如臺下保釐之功卓乎茂矣粵夷伏有戎心邇復何似知曲突徙薪妙有善畫仰惟聲實兼隆朝野倚重且暮應借節鉞素辱宇下之庇者亦奚敢後緇衣之好也家姐夫徐某守其誠朴幸戴二天臺下推屋烏而破格提之感佩曷已冷局無以自見欲乞一管稅小差似屬羶名宜爲爭地又慮其以此賈罪然

自大德施之直足噓枯潤朽倘其敗度歛怨臺下直繩以吏議可耳誼不容己輒復冒賢

荅門人林魯玉

諱森

美人之想何日忘之忽接蘭訊如捉麈相對也清心妙義博雅宏深充前力而引新緒日復疊疊爲期一彈指間杏林春煖矣不佞業已戒途輒思稍言天下事故人相愛宜有良規若綺語頌言非所願聞也

與劉康谷父母

林居數月備承帡幪行時纏綿之情迥超管格非復可以筆舌謝也仁民之政宜民宜人芻蕘之言莫佐萬一竊有私念謂老父母臨事詳慎博訪精研自是神君妙用然人心不同耳目難寄甯兢兢而獨斷毋旁聽以啟奸且行簡則日有餘閒省訟則民無紛擾

乾坤正氣集

卷三百二十

七

嚴懲差役下鄉之腳馬力禁捕衙擅受之呈詞舊糧徹底造簿摘徵欠多己蒙采家父之一得近聞簿止開米數而不載田糧終爲那移之端亟宜查田改正凡此愚見聊附古人贈言之義以備高明參酌家父愷直成性每好盡言惟老父母以通家至誼善體鑒之尤不肖所夢寐弗忘也

與曾二雲公祖

豈弟作人求賢如渴此賢侯事也文章氣誼友朋相引此弟之私也多言煩稱寔皆士林之秀向別時而面布所云幸不以多爲罪而愆置之者則請陳一二焉武進諸生吳鍾巒弟十年之師也名宿品孤羣望所歸寔應冠軍之選不求平等之知無錫諸生顧嘉舜江陰諸生趙淶武進諸生吳鍾罄皆弟所心儀于師友之間者也悉望注以隻眼高拔其名若家兄應良苦心力學試必先人家弟

應星穎而有志老公祖垂情而破格先之又不得弟之諄懇矣其
臨期開請子弟至親從鄉紳之嘗例者家父主之幸不以相廢蓋
弟所以私于老公祖者止此

答錢牧齋

不肖孤踪暗識臨淵夜行于天下國家之故茫如也然私竊自念
時事破壞絲紀綱廢弛此行塞白將以爲首而辱承台教忽發其
蒙台翁居揆席握樞衡其于清明黨振紀綱茲一言仰窺一斑矣
所恨匆匆就道弗獲請益孰爲切要之欵孰爲整頓之方倘有便
郵不吝終教之否乎孫老師身繫安危還朝何日翁台何以籌之
并希指示講筵虛左寵召非遐拱聽履聲之入發武庫之藏耳

答楊周卜

諱新期

台臺夾日孤忠擎天巨手褰帷行部江漢爲清屬當黔蜀多艱兵

乾坤正氣集

卷三百二十

八

食交匱百方措處以効纓冠者罔不干楚是賴非藉台臺妙運經
綸力籌接濟則西南半壁已不可知然勦局未畢撫事難言水藺
合謀後憂方大恐須終藉神畫以爲勝着若朝堂之上不過拱手
以聽似未易卓然建一長策也某書生踽踽初塵驥後未申仰止
之私先辱瑤函之錫旣不敢卻賜以蹈不恭之罪祇有抱愧啣勒
而已

與繆西谿姑丈

自別台顏後以九月望抵都門晤諸相知皆亟問還朝之耗計閏
月中定得侍色笑冬寒晷短不如早發爲便也此中議論正是清
明一二伏恭彈擊以去卽雨中閃爍今已去其大者想邸報具已
入覽福清行志自不得遂弟聞蒲州誤信聊城故福清深以爲憂
主上神明而內憂未杜激之不可緩之不可所猶可爲者大瑞雖

得志亦畏外廷之議使交關之人去則清明之象可長保也不肖
初至無所知識塞白之後行觀先後緩急之宜要不足當一臂碌
碌爲愧如何如何新總憲屬之司寇新家宰屬之總憲俱可謂得
人副院將借重李懋明矣近惟點陪之舉一箭雙鵰爲小人播弄
機關門總憲深爲主上所器重可無憂此覆轍耳此中之事大都
止此家中之事則望少篤故舊之誼一斥讒構之言使鄉曲間知
有甥舅之名使家嚴少釋眉頭之苦使不肖得免三千里之憂此
姑丈懇摯本心而尤祈申告誠于臨行之際者也仁人厚德骨肉
一家不妨直率吐其肝膈想長者必能俯原

答劉念劬

諱應遇 許墅鈔關

敝鄉爲加派之重兼織造之擾民力已竭卽入于關者利在東西
南北也而鄉民斗粟漁舟動遭科迫今之爲關其謂之何臺下清
乾坤正氣集

卷三十一

九

心妙才愛商恤民上不妨公而下利于途此不佞所翹首而望也

答李懋明

某之謏瑣獲託蘭臭餘芬每領教言如寐斯醒竊思中外多故厝
火漸然非真豪傑識力作用不能擎天柱而補地維台臺主盟吾
黨匡濟斯民津門鎖鑰暫資韓范而望隆寔茂指日借重名碩以
表正中臺肅貞百度蓋中外同心正人翹首久已有定擬矣某辱
以舊知式軌就範稍得伸其眉舌以爲前驅則誠三生之幸也摘
瓜共嘆伏莽未消愧此綿力其未有效亦惟台臺終進而教之

答解羅浮

諱學夔 沙縣令

向聞沙之清幽爲仙吏飛鳥之地年丈翩翩乎仙才仙骨則真仙
更也治行卓然長安譽滿其以異等趨召與令弟年丈共吐筆上
之花而鳴梧桐之音者指日計之弟託在籍末最辱兩年一二契

同心之助幾幾望之願年丈努力竿頭以慰故人之望

答李世臣

諱喬祥符令

向從行卷中竊領文心直望爲天際真人也卯之役獲附驥于令
兄少文年丈想見瓊枝玉樹王謝風流而今仙令飛鳥兩地琴清
又見潘安之花縣矣芳譽翔空冰鏡倚望辱有兄弟之好詎禁起
舞耶令伯碧翁老先生舊沐國士之知久疎起居每懷夢寐便希
道此耿耿

答徐見與

諱廷宗荊州司理

理官之寒瘁不佞向身嘗之矧荆方多故轉餉徵兵日不暇給上
費調停下煩綜核自非老鄉臺之敏手遊刃朗若懸空者孰能勝
其任而愉快乎賢聲久已滿都下辱在梓末實有餘榮維國是而
清仕路同心之助翹首望之品地卓然端不以齒牙爲重而秉懿
乾坤正氣集

卷三十一

十

好德亦何敢後焉

答魏仲雪

初秋一通音問弟卽料理束裝修復半年矣關政清惠遠近所傳
然以仁兄道品居此市曹終非了局同志俱以爲念歲底轉局自
是弟之責非兄事也公言之私言之政有計議意得南銓乃安同
人中極可同力者有魏廓園在邑中諸兄試事風波弟竭力周旋
乃得之于文宗又得之于儀郎而宗伯執意甚堅必欲少處陸兄
故不得已聽之然儀曹定稿行察衆中首事之人弟三懇之而後
易者區區之力不可謂不盡便中可與諸友知之勿以一人牽累
爲弟罪也弟率其胸中所見與廓園爲同盟聊自有以塞白然欲
不見首則難欲以一口挽奄人膏肓之疾又難之難南中有所聞
幸索便示我新詩種種讀之冷然一清長安車足之穢弟詩腸又

去日以城務紛紛客席擾擾卽欲覓一句爲酬弗可得也方青峒遂別數年使人胸滿鄙吝今在家乎在官乎何時得一把臂念之慨然

上孫愷翁老師

伏聞駐節關外進而逼奴廣甯可唾手取也傳者言老師運籌之妙謀入遼陽以數行空札離其腹心爪牙疑而誅殺者無數如此則奴在吾目中矣或者言卒之任甲者不過四萬將之橫戈者亦復寥寥王帥乃至墜馬人言固不足信然安得如李愬者以副老師之指麾乎時可乘機可赴老師勝算在心而將卒不能如意則守之功不下于戰關一廣甯似亦費收拾也謀不萬全勳不如靜書生儒見固若此矣老師幸私教之長安議局紛紛往事都不足道近者老師大疏鼓舞邊疆將吏之心平衡戰守左右之袒自有乾坤正氣集

卷三十三

十一

深意豈爲市德而諸人有心欲言而口不敢出有本欲偏主而語難異同至于敘防之中多有衆怒所向坐此呶呶迹幾相左然老師微通其變而言者自守其幅正可置之度外大段人情只好眼前無事耳老師敘勸勞臣其掛議者倘姑聽焉亦聖賢委曲行道之微權也老師以爲何如讀擒妖始末敘言可謂仁義並用而心一諸老意弗盡然恐寬一步則彼亦進一步此又弗悉老師公平宰物之旨者也某茫昧無所知而四哥示以台旨若可不棄于門牆故亦感發吐其坐井之見供老師一哂雖闇昧知不罪也邊地霜寒軍務蝟集伏惟爲國加餐一縷申獻望恕菲褻

答熊壇石公祖

長江一帶鯨鯢爲窟而敵邑下當其衝若奸宄鼓楫如君山聚兵之謀則父老子弟不得安枕卧矣幸藉台臺握鎖鑰之重運制勝

之奇使羣妖授首江上安瀾從薪之功勒之彝鼎某託契蘭芬之末竊邀梓誼之餘備員言責撫心莫語惟是邪萌之尙伏視羣妖而易蔓台臺澄清南部正人所依何以明教愚蒙使鼓螳臂乎

答何武莪

諱士晉

景仰鴻名已經十載自辛酉春一函通候又及三秋矣依佩之私無刻敢後而往返京邑車塵無定心期渺渺空望嶺雲而神飛耳粵西天末非所以居台臺惟是震鄰四警半壁支撐不藉方叔召虎之猷孰當金湯鎖鑰之寄台臺誼急纓冠過于室中自救虛聲實着使之內孤外懼焦頭爛額而不居其功功在人心簡在帝心此非一人私言也分專閫而樹偉伐桑梓獨藉台光還朝伊邇詎容多讓至吾黨同心亟望羽儀不肖孤拙歧領渠誨又未可寸楮盡矣

蘆坤正氣集

卷三百二十

三

答夏緘庵

星渚之荒涼天下所稀見然青山白石古壁寒泉雅與吾輩道氣相宜台臺兩年循良望冠他郡者品固以地益章旣兩入啟事參藩不遠獨錢糧考成太嚴而催科往往見怨地方之難殆不堪久處弟辱在素知斷不敢自愛其綿力候有內地之缺即可借重此鼎分內應爾其甯敢先貪天功雅意稠疊見之驚卻正施可以交誼拜登別賜附陳完璧相契之誼固不在世法中非自外也但萬二生無辜可念附致一函于黃陽平候其行部將近或在省行事時覓便致之然後令二生控訴總惟翁臺斟酌并示二生知之

與黃陽平

諱元會江右督學

往年共事雖一江相隔而神氣交親沐高雅之誼特甚時耿耿念之江右文章名地邇來風格卑弱翁臺大振宗風別其腸而煥其

彩誠此道中快事豫章此後數十年名碩之胚胎也頃以考成溷
及渤海無論輕保障而重繭絲且舍經手而罪他局同志共駭既
己明雪不必介懷矣白鹿書院與自紫陽先輩名賢加意造士一
切科舉月課之規素關文宗條教舊南康袁九際規畫潤色起敝
維新而不佞弟實董率之月以朔望再宿山中風雨寒燈手披口
授以刑官兼塾師者蓋五年于此諸生文心朴習亦既改觀辛酉
賢書三倍往日不意去秋張鍾老修郟于舊南康因摧殘其舊子
弟幸舊按臺汪石老九江道陸景老苦口力爭漸次收復而覆盆
者二生其一則但宗說也宗說兄弟在南翁鄒先生門下文才行
誼卓然白眉特以舊南康生祠此子實爲倡首故患病卽先降等
補考竟行奪原言及前事直使魄飛翁臺試召而試之其文豈五
等秀才乎然此猶有倡首生祠之說也若夫萬人傑者家徒四壁
乾坤正氣集

卷三十一

三

年少力學舊例洞生另錄遺才此生適居其首先欲破格作興遂
爲請附正案帶道汪來老實允行之因得揆次幫補乃竟罪以鑽
刺然則誰爲受其鑽刺之人申文者乎批允者乎嘻亦甚矣且當
時申案見在舊敝廳中翁臺試弔而閱之區區鼓舞之深心將爲
書院之美事彼山空墮冷草布貧坐非有微名安肯趨赴今卽格
前例不行停其廩可矣痛加箠楚禁錮終身此生何罪鍾老弟以
洞生榮辱悉關舊南康不知此生一事在舊南康去後池魚之殃
六月之霜仁人君子能無心痛而況不佞弟實貽之戚能坐視其
呼天嚙心噤口不言乎幸翁臺昭雪無罪還其故物此可以質諸
神明告之西江士大夫非私意干請他人可以援例者亦所以善
成前入而掩其白璧之瑕也恃愛冒竇翹首報音

答張蓬玄

諱鳳翔保定巡撫

台臺口口定力功高定亂已勒鼎彝而垂銅柱矣隆恩再錫中外
懽心萬里長城方借中樞之席廟謨國是咸藉主持所謂斬釘截
鍊之手非台臺誰屬哉向過部下快領塵玄懷清風而瞻朗月至
今寤寐不忘也不肖識短心疎處非其據飯依衆正矢効綿力讀
雲中之札三致意於否泰消長之關則既發其蒙矣清明之氣尙
存陰伏之邪欲逞惟具瞻之地長得正直開濟如台臺者秉衡持
鑑爲國家抽出一片赤心白意以振紀綱而辨賢奸則一二伏莽
不足慮也惟台臺有以教之

答周柱明

諱邦基兩淮巡鹽

國計賈誼司農仰屋兩淮鹽課居天下之半所藉台臺風清海若
月皎冰壺以足國裕商民甘其味而吏易其腸真從來離政之最
也茂績已書還朝伊邇南天之霖雨行爲北闕之鹽梅不肖幸獲
輒坤正氣集卷三百一十
飯依可勝欣舞乎

古

答吳灑石

諱嘉賓南昌司理

豫章司李非勁骨敏幹深心密理者不能勝其任向見張忞生年
兄歎爲卓絕近聞年丈治行復遠過之南昌諸公人人頌服而湯
參于年兄尤悉道懋績至品識之超於治理外者方方石年兄深
道同心之誼貴鄉銓衡虛左以待非佞語也司李之寒此弟所親
嘗況年丈兼干戈顛沛之餘幾於無家何堪修長安之問敬以璧
返雅意固心佩之矣

答吳生白

台臺天青月白心事皎然不肖每私仰焉人倫絕品粵東治行卓
冠列藩猶不無積薪之嘆祇緣清卿壅雜搶攘成風開府未缺耽
耽先視遂使藩方牧伯遑弗暇問如台臺之譽望亦復緩焉然官

如傳舍人無可謀之績而台臺三載奏功造福無量長城萬里支撐半壁旣已名實兼隆廷推首爲屈指第建牙方議久任昨叩之當事者擬卽借槐棘之班不使周召久勞於外也分宜駢語奏報近有堂約率以質言惟鑿原之

候周老師

閏月初接得台札備承眷念之隆兼於令兄老先生時悉道履甚慰懸念計違師範八月於茲矣胸中茫然如故紙上索然無奇竊復虛觀天下事豈做成風贅疣日益思啟一言提其綱而振頓之心短手鈍格格不展局中鬪勝君子弗爲獵有喜心狂奴不讓老師得毋嗤其愚乎雖然此亦台誨所謂言其心之所欲言不盡鬪耳根之入也今時言官正自不易薦人嫌於市恩糾邪又爲傷體觸諱立見摧折條陳祇付空言老師謂何道而可幾幸乎近者于乾坤正氣集卷三百一十

五

役北城尙得少解尸素妄意廵方異日或可效績於地方若株守螭頭日弄白簡真亦虛實剛柔兩難之局也但差期尙遙須有一年紛擾老師幸時惠教何人何事明白示之使知趨向爲望毛禹門衆正所宗望其賜環以日爲歲而大璫故持之今且觀呼嵩前後想有好機括耳小疏如命錄上以供覆瓿臨風不任瞻戀

與毛禹門

山中之遊大有勝情不喜識張公玉女喜得仁兄兩日夕清話也高誼依依歸來心醉亦有數言屬韻竟以塵冗置之乃行時未通一函以乞司南而長安又辱翰惠愧何可言仁兄鍊骨水鑿力廻旣倒之瀾邪黨構陷正人氣短今邪謀已破公道昭明劉朝先服其辜王一鵬亦落其首衆正喁喁之望且暮得見賜環而魏璫爲朝修邳持之不變今不得已變其說於蔭襲之覆行爲善用小人

之微權以通君子之路是一道也嵩呼前後應有轉機吾道將行豈使直臣久錮乎閣部方有同心所藉不在議論弟慎有欲言再觀其後可耳

答蕭元恒 諱毅中江北學院

台臺文成作吏羽可爲儀人傳殿虎之名士仰泰山之望而敝鄉文格漸下士習愈暮江以北實甚仰借人倫之冰鑑兼作吾道之宗盟旣起其衰亦肅之紀使多士彬彬於文質則高皇之靈實式憑之不肖拭目以觀謹謝教命之辱

答劉康谷父母

行時備陳謝別之私不覺罄其狂瞽老父母大雅君子以道義取人不重諾諾相欺者故幸無罪然已惶悚無地矣邇雖鄉訊曠隔私念豈弟宜民雨露日渥目所覩記孜孜民事推心置腹而不飲乾坤正氣集 卷三百下 夫

一杯水則古循良治行亦何以過此哉武襪嚴酷可以御吏不可以親民潔已愛人可以親民亦可以格吏夫催科何傷撫字所畏者頭緒多差役煩耳胥不吮其血而課必搜其根寬於八分以外之錙銖而嚴於八分以內之什伯老父母持此法以無倦國與民兩利之道也祝融爲虐慘傷如許老父母憫然罪已自是父母之心然五十人之劫數已去而千萬人之待命更殷仁人君子遂忍愀然乎學院孫老師處適備道卓品精心亦聊効輿人之頌也

答葉葵同 諱成章長洲令

老父母以天馬行空之才本以止水之操持以如山之力從來所號劇地脂途今爲花縣琴聲矣敝鄉邇有天幸豈弟君子萃于一時然如老父母之壁立千尋固鄰封子弟所飲河知潤而齒頰爲芬者也種種瞻慕之私敬拱俟履聲于山公之座矣

答史崇仁 諱敬英

門下神識炤臆妙手剗犀以崇之頑且傲而恢乎有餘地焉神君
父母之頌亦彼中所數十年而一見者也不佞向叨共事備悉鴻
猷雖芝眉未覩齒頰爲馨竊自附于緇衣之好久矣敝座師居鄉
端介生計蕭疎令其身後二三世兄皆誠懇君子居刁頑之俗有
門戶之憂惟門下加意覆露之諸孫中尙多俊才有名道昌者不
佞向于觀風拔之如遇試事爲之垂青皆所望于二天不淺也

答韓參嶺 諱光祐

恭惟老公祖正氣千尋宏猷萬頃席上繫夔龍之望江右借周召
之謨某向伏下里側聞吾儕小人歌甘棠而頃濫竿班行乃益從
衆君子後依泰山而瞻北斗也自維待罪匡城拙戇之愆見羞五
老顧得叨庇廣廈掩瑕匿垢台臺自以九州子弟特容覆之此德
乾坤正氣集 卷三百二十
己渥又辱瓊瑤之錫某永矢弗諼與甘棠之澤俱長耳一絲爲獻
亦其土之毛也

答陳玄洲

行時備承欸洽復三千里而辱貺之何其厚也邊疆多故正藉妙
手支撐乃澹然高尙黑髮懸車當人情躁進之時表急流勇退之
節鄉有羽儀後進者其望清風而動白雲親舍之思矣功司題覆
早已囑之不負明命誥敕亦託敝同年轉那得之不誤期矣蔣尊
老榮轉兩語兩選君而皆唯唯以倖少爲辭今少宰已爲留意亦
云須得一入都爲便乞轉致此意尙在此圖之也

答楊斗樞

軍興以來司農仰屋計惟蕘海爲自然之利而疏通無術商竈兩
困敝鄉之所流行于深巷荒村者則皆私販也蓋官私之貴賤殊

價醜淡異宜民情趨其所便勢不可以盡禁急之則爲盜資耳老
公祖經國宏猷濟時妙手其必有以處此下車以來清風明月昭
拂三吳鐵面霜威震懾百吏旣已不言而飲德矣弟某居江陰常
熟之交兩邑父母皆清操絕俗表表一時而常熟尤資深績茂惟
老公祖行部大獎翼之誠足以助揚仁風者也

答同年某

時艱財匱處處捉襟而邊鎮虛伍冒餉漏卮不塞則竭海內之脂
無益也清釐節省詎不在司出入者苦心妙手哉年丈水蘂爲本
副以風稜重鎮免脫巾之呼司農藉同舟之濟實然時輩矣春回
歲改遙望卿雲分我椒觴輒慙臆腹不盡瞻佩之懷

答馮弓問

諱起繪豐城令

徵天之幸獲託大雅君子聲氣之同更喜劍合延津共事江右每
乾坤正氣集

卷三百二十

太

嘆臺下經緯精心冰玉粹品以極繁極連之地恢恢乎遊刃治之
有何妙道以臻此豐城寶氣有識者共欽其難名不獨弟之私誼
津津于舌也

答余星子

寒雲冷岫吏隱名區與門下相對直如戒行僧也僕已遊五都之
市日弄廣長舌不自知其刺刺而門下清靜如昨爲衆生廣渡慈
航功德無量見使者讚佛之音輒爲合掌喜星渚宗風不墮吾黨
生色耳分香鉢以惠我具有飽意然豈水舍所宜殆恐無福消受
別獻寸絲不當芥子毫末也九江道陸景老附有一函望卽轉達
鹿洞諸子并希垂念耿耿不詳

答李緝敬

諱日宣河東巡鹽

久違台光時切夢想向讀大疏軫念子遺無告議請款以濟加派

之窮真拯之于水火之中也敝鄉此弊亦復剌心而任事實難良
令不易廟堂之上粉飾目前違念有啼饑號寒敲骨吸髓之哀黎
乎既兩奉旨下部度當事者應爲動念也草復不備

答汪南康

諱宗文

匡城寒氣如陰山之雪固足以表絕俗高韻乃吏弊民瘼卽小家
頑惰爬搔整剔大費心手台臺入其境有慨于中其亦以鄙言爲
識途之馬乎不佞五年罪狀都如行脚僧噫喜隨緣瓢笠空掛而
魂夢所結似有宿因者則白鹿洞諸生山寒月冷年夜課燈亦復
少發羣中之秀行車一隔遽如星散鹿眠草深文心茅塞每片函
寄訊輒有榛蕪吾道之感台臺固紫陽後身也時雨之化倘有意
乎

答宋文希

諱賢嘗熟令

乾坤正氣集

卷三百二十

九

老父母天挺異才幽微畢炤推心置腹人人在懷中眞神明而父
母之矣左右之人不得關一短長之舌尤四方所交口而頌爲從
來飛虎一見歛翼之日以此定力秉衡持鑑山公之座虛左俟之
秉懿好德人有同心匪特舍親仲嘉兄與不佞之阿私所好也

答姚鏡初

諱應嘉巡漕

恭惟老公祖以舟楫之長才展風雲之妙手波臣効順魚龍不驚
百萬京儲啣尾而進使都下人心恃以無恐者則皆經綸指拮之
偉伐也敝鄉屬在几席之下尤披霜露之多某實沐浴明德而未
伸一介轉辱瑤錫耶感與愧俱矣拱聽履聲齋心請益

答趙總戎

諱率教

朝廷爲遼陽一塊土歲費數百萬金錢以養戰士不愛高爵重祿
以任武臣且以樞相三朝元老親履戎行蒙犯霜露此誠大丈夫

立功顯名之秋而志士枕戈飲血之日也兵將坐食海內空虛而不肯者尚忍吸部卒之膏圖歌兒舞女之樂刺士馬之肉作賄權媚上之資每念及此輒生痛恨比聞樞相愛重將軍力與督部爭以明將軍之材勇而又有言將軍屯粟如雲軍令嚴明愛恤士卒者故疏中特表出之亦欲勸將軍之後黽勉建功以分知人之明不願以餽遺及也雖云自種之毛然以此以舞一裨將則一飯之德必有奮勇以報私恩者將軍其赤心白意撫循部下與同甘苦竭力屯種以助軍需勿以中朝毀譽爲念來儀附返已紉雅意不

一
答劉康谷父母

老父母素心惠澤出敝邑之民于水火積蠹潰穴方有清緒正貧黎乳哺奸頑格心之日也奈何以五十人之劫灰而生引咎拂衣乾坤正氣集

卷三百二十

三

之想乎知己俯順民情甚爲欣慰舊糧理無併徵某以綿力爭之再三不獨爲一方也昨小疏入告奉有明旨已許議覆蠲免且計部先已題明泰昌以前不在參罰之例老父母其出實力擔承莫以吏語搖動此理勢確然有害無益其實始議亦決不以舊糧之罰累老父母也惟遼餉似聞全納何故解不及格昨以老父母治行告之餉院李層峰舍親集云論欠應議今姑置之不言極知卓望不得不爲法而遺薦也老父母倘一查之二三年分之遼餉豈有從中侵食者乎家大人備承下問可以生色家兄弟不才見擯有負提攜尙有錄遺之路九鼎全藉神力此自至情公典度老父母亦決不忍坐視子弟之沉落固不如正試之聽命于冥冥也

答須日華

諱之彥

傾耳台丈斗岱之標五六年于此雖蘭芬玉塵無緣一親而向往

之私固不啻執鞭之慕也以濟世深心運奇偉略加之秉禮賢勞
僅借滿座清卿之一席乃不免于求多之口豈才名固屈之招乎
辱在梓里實深惋歎公論自明台丈卽暫抗白雲之節亦不得久
卧東山也翰教之遺甚感高誼若台規則愧無瓊報敢以璧返伏
惟台照

答徐若谷 諱良彥宣太軍門

四方多故人心皇皇借重擎天之手支撐半壁鎖鑰有託從此可
安枕臥矣惟是重鎮勁兵乃化爲疲敝之色台臺慨然于向來之
視爲故事則自後之實心擘畫指顧風雲如李臨淮之壁壘旌旗
頓爲改觀者可不問而知也伏承翰教敬謝不忘

答馮禮亭 諱嘉會

往過部道披拂仁風兼沐百朋之錫輒以不見荊州爲交臂之悵

乾坤正氣集 卷三百二十

三

比聞壯猷神識曲突徙薪坐消妖黨之氛克謐震隣之患望高伐
重不宜久勞方叔于外當事者謂卿貳之坐鎮不如秉鉞以勸勤
中土之救甯尤屬腹心之要地暫需時日以暨鴻施履聲之入拱
聽之矣

答南損齋 諱居益

台臺具瞻之望山斗爲標獨座之尊風雲在手屬以海氛之弗靖
方憂紅夷之薦侵乃大振威靈克揚我武伐其謀而創其逆東南
偉績旣聞快心使海濱數千里盡安枕上之驚濤者功將勒之鼎
彝也傳云夷吏欲與倭爲媾知屬託音恃有方叔壯猷奪彼殘魄杞
憂固迂無當台臺其有以教之

答侯六真 諱恂貴州按院

老年臺直節凌霄壯心賀日驅車絕域手奠危疆當慷慨請纓之

時固已知逆酋在指顧中矣作儒將之氣厲死士之心解督撫參商之意見而奏犁庭掃穴之勳銅柱先標非老年臺爲第一哉善後之宜人心爲本使蠶蠹諸苗皆仰天朝威信而廓然無貪其土地之疑以安反側以杜後憂度老年臺必有成算無俟杞人覬覦也兵餉如珠百費若掃猶分長安之俸以惠同籍見此眞欲汗下其何以消受乎

答溫清霞

諱阜諱四川按院

蜀土傷殘逆酋竄處仰惟文武壯猷運奇謀于掌上懸勝算于鏡中使巢穴之洗蕩無遺黔黎之安堵如故功在彝鼎詎尋嘗攬轡可方萬一哉黔師告潰岌岌乎有後憂九鼎之力尙在蜀師之扼吭擄虛也合臺幸終計之還朝伊邇拱聽履聲

答陸太和

諱獻明

乾坤正氣集

卷三十三

三

黔事之裂也方幸台臺入而匡持之比見大疏批卻導窾目無全牛矣初聞驚報時長安沸然皇皇無策竊謂台臺尙家居不知受事何日乃有就近借傳公祖之議不意議出而台臺報代至矣多一番改移枉却台臺半年之辛楚百種之籌諮然楚固劇地震鄰之警徵兵轉餉責望更殷不如黔之一意理兵而合四省將伯之助也此舉以酬傳公祖向來之請纓耳恃愛布其所聞統惟台炤

答王元珠

諱心一廣西按院

粵西非無事之國也而今黔又告變矣外思助兵內思轉餉吏旣畏足民復存饑台丈處此其難哉甘露以濡之清霜以肅之淵機神識以妙運之知台丈裕加于此第批鱗直節望重中臺恐驄馬之跡未及遍而已被還朝之命矣何武老勳望兼高羣賢推轂然尙遲時日者欲展其偉略于疆場不欲虛糜以坐嘯畫諾之地也

晤時幸爲道意

答胡漢涵 諱一龍

節省美名也賢者行其實不必居其名矧取其名而忘其實者乎
弟向固訝之然君子成人之美雖非旣其實亦姑取其意百方補
苴而上下交和了前人之局卽後事之功也老年丈深心妙手知
應之裕如矣

答謝元中 諱文錦 江西按院

恭惟年臺持斧西江以懷中清風明月披拂而炤之威惠兼行旣
已入吏民之心而出士大夫之口伏讀大疏文吏武弁誅鋤霜肅
眞使廬峰日白而章貢波清矣弟彼土舊吏遺愆積戾所賴庇覆
實多還朝伊邇諸容面請指南

答張虹海 諱五典

草坤正氣集 卷三百二十

五

台臺淵澄玉立品望隆重海內正人方將偕重廟廊主持國是不
宜棲鳳于棘也然廷尉天下之平東南生德實于焉在君家釋之
後先輝映矣暫領白門清況以當洛社優游行聽履聲之入慰不
肖輩瞻依之私敬翹首以俟

答李碧海

某待罪江右踽踽涼涼舉足有冰淵之畏微有奇幸獲庇二天拂
之以清風炤之以明月濯之以百丈之瀑而煖之寒谷之嘘進不
知爲上官退不知爲屬吏微若託道義之阿仰對于冰壺霜栢之
間者亦世法中一僅見也每念高韻孤標振衣千仞之上長鳴梧
桐之岡而雞鶩羣棲驚爲異物莫或想其來儀任與冥鴻同遠則
竟不知爲何心今方有按圖素駿中流思柱者台臺其未得輒想
東山之屐也五年來驅馳東西南北之交不通一字以候起居念

之便欲汗下但聞鳳雛噉噉一爲慰心獨袁九老竟中諧者之毒不平之鳴屢欲一伸而略有俟也然吐三寸舌告于友朋則旣時時不輟矣

答楊升之 諱兆升

台丈聲光若斗氣韻如仙文章吏治俱從素心而出卽操刀未幾而遊刃已恢恢矣地當孔道應接爲煩要以譽望之易騰亦復在此方今催科撫字須兼用而密劑之一方黔黎所仰以造命者惟令是賴若清惠宜民寬嚴合道眞官之本而德之基望台丈勉思其後東陽做親家品政卓然可爲地方同心之助便時希道相念

答黃行其

諱願素撫州司理

向叨共事每嘆服台兄精心快才投機迎刃一段光焰都從淵然靜焰吐露不見些子矜激之氣何其妙也撫固劇郡台兄兼而攝乾坤正氣集 卷三百干 西

之政績益不可勝書春明門外酌酒彈故人之冠期不遠矣敝門人張憲卿蕭然狷潔不屑一問竿牘然時有塵甑之憂尙台兄高誼爲懸徐孺子之榻使得館穀資則一幸也恃愛附瀆亦不必其知特以助緇衣之好耳

答邱太邱

諱兆麟川湖督餉

不自驚下亦微託有聲氣之同時欲竊領蘭芳少醫俗骨而西事再棘台臺匆匆持斧以行至義不反顧倍道驅車蓋明以簡書之畏鞭中外疲驚之筋使人人殫心瘁力憂國如家呼吸應手豈患夷虜哉剗楚之肉填黔之壑壑未有已而肉且盡然自台臺苦心調劑則緩急之際腠理畢和轉輸之餘神氣自甦新撫沉毅其以當台臺之提授智意將日長西南半壁終賴九鼎在幸竟籌之使得竊領緒餘以釋杞人之慮也

答何武莪

台使行已勒數行奉報計爾時台臺且移鎮矣名賢碩望功在社稷不宜久勞於外而重地借才每難推轂之選遂欲以黔局相煩幸與霞城曲寢其說然復倚重鎖鑰者將竟經緯之緒以撐東南半壁也一兔百逐誠如台諭而終不能與台臺爭國史之芳名卽黔人忌功亦終不能抹殺西兵俘斬之功次鼎鼐旂常日月爲昭特黔局再裂姑閣前功亟議新罪故台臺覆敘恐少需黔事之定耳公論昭然人心不泯樞衡之座行虛左以俟拱聽履聲未須介意目前也綿力無益高深祇有血誠仰依道誼

與王靖江

江干僻壤上潤而俗龐從未沐名賢之化地脉乍轉遂來福星豈惟江流夜靜韻響絃歌且使下邑風和光華炤映地方之沐澤鄰

乾坤正氣集

卷三十一

五

討式詠孔邇未有如倣邑之親且暱者也往在都下拜謁屢勤識荆緣薄邇者鄉之父母咸播神明之譽以達於長安因私念倣邑赤子煢煢無依其提攜而乳育之上有推心之誠下有投懷之慕者莫若老父母是扳是望老父母倘不棄哀黎而憫收之乎

答吳本如

諱用先薊遠總督

薊門鎖鑰安危所繫中朝之躊躇四顧者久矣台臺以宏毅大力淵微妙用上膺主眷下協輿情往肩擎乾之柱欣欣慶得人伏惟台臺經緯之餘濟之以同心同德之雅師克在和則今日滅奴第一義也狂瞽之愚倘有可采乎

答貢二山

前已有字奉答略悉此中情事見來札甚喜一遍音耗然格套之拘寵賜之厚令人發一大慙吾輩以心相炤兼欲得人爲世道之

寄真無牖不剖柰何拘拘於此同鄉同事者固須氣脉相通然太過亦非所宜吾輩於人事周旋中仍存一種落落之意乃覺久而可思耳賢郎青其矜聞之喜躍容寄賀於家然竊有進者少年捷才一試先人席家世之華鍾掌珠之愛須善保其金玉之德器而遠於澆薄之俗習謙爲福之基靜乃學之本老叔教子之急務固不在居官砥名之下也辱在骨肉之愛不敢不布其愚至婚嫁大事父母之心人皆有之豈敢執辭近於不情之論但弱息不勝衣遠欲儼然爲婦時則未可願少需之來歲想能見諒也台賜太侈傷惠傷廉兩無一可謹九頓以辭倘異日粧奩菲薄稍寬其督過可耳一笑新按君及新鹽臺俱已力託之更待報代書到再手札叮嚀不煩掛念也

答魏明實

諱尙賢保定知府

乾坤正氣集

卷三十二

五

上公爲畿南保障昔人云得一良二千石當勝兵三萬值此邊烽四起綢繆拮据爲力倍難靜以甯民勤以固圉動以作氣正以勝邪老年丈蓋恢乎有餘地焉夫令之貪廉媮敏府可炤垣見臆也公而察之母取其比此亦治之大端知皆年丈之所優特以辱愛故刺刺言之想不罪也

答王旭泰

一別遂隔數年甚切清風朗月之想每聞芳聲四達輒爲色飛近得晤老年伯詢知起居治行曾幾何時而忽有歸來之賦也驕軍鼓譟習爲故然卽輦轂之下可毀御史之第謹戎政之堂何況僻壤此政不足爲年丈累但爲紀綱法度長太息耳彼中兩院題疏不審何若年丈第靜以觀之可也

答解羅浮

老年丈治行卓絕閩中士大夫交口頌之弟嘗妄謂令在今日不難撫字而難催科調寬猛之宜酌緩急之數上不迫於功令而下可喻乎民心譬如慈母爲嚴師正使督課凜凜其神不傷老年丈治術之妙卽他日秉衡簪筆以進退君子小人者直而和正而靜皆此物此志也令弟年丈辱氣誼以收之併祈道耿耿

答鄒靜長

得手札縷縷膈言足當晤對弟出口招尤取忌正想默鈍之法蓋不俟籍也第舌不能茹年兄何道以醫之邊疆之事率多隱匿來教中所謂豸冠走死覆軍不報者尙未得其端委利害所關甚非渺小幸密切示之懇懇

答胡泰六

恭惟老公祖夙係群生之望久爲衆正之宗敷歷風猷奠安百粵乾坤正氣集卷三十三
首膺簡命明允五刑夫舊京豐鎬王脉所鍾而狐嘯狸鳴政弛法玩固非優游表望之地將觀平明最志之風正藉老公祖以正直孤清不茹不吐屹然表正肅法持平使奸宄畏而潛消蠹窟從茲一洗天眷方篤佇聽履聲且不可以舊京淹剋欲爲東山民也某仰止高山又沾棠蔭敢想丰采之炤曠庶幾道義之提撕乃辱瑤函披對諄篤拜嘉腆賜何日忘之

答李緝敬

察吏之暇聿興正學絃誦之聲遍於秦晉讀大疏及傳是堂稿發名賢之光續往聖之脈真吾道中一快事也學術不明人心日變君子與君子自分左右之祖而發之自貴鄉向使台臺居此則異同之見甯不悉化於大治乎憂心世道莫先於此使舉朝有同心同德之風毋多讓美於秦晉是所望於台臺以道力攝伏諸君子

者耳敬謝大教併布其硜硜之愚

答閔非臺

諱心鏡崑山令

老父母天駟異才鳴球清韻發硌之初迎刃而解崑雖數易長令然玉之在璞市人却走遇碧眼胡授之良工珮之琢之遂爲連城之寶今亦其遇良工之日也老父母信心合道何局不收酌法宜民何弊不去清者法之源也惠者民之母也斷者胥之藥也勤者政之樞也老父母始難之則終必易矣躊躇四顧乃奏刃焉所以晝然解也弟幸附玉筍之班竊分棠蔭之潤拭目望治敬矢欵欵之愚以復明問

答徐泰掖

辱在維桑之暱而涉世日淺無路覲光芝玉每披讀奏議私識中原牛耳實在翁臺竊願執鞭弭以從乃廊清之餘坐食其賜流螢乾坤正氣集卷三十一
天
一點掩景月魄何以辱翁臺之拂拭也舊京清議素砥北流恃有鸞棲時廣鳳響乃此中近事意見偶分遂生同室之爭不免歧路之哭翁臺憂心世道如何以止其沸而解其縛乎日讀討逆大疏仁人孝子甯無心惻妄謂真僞二字共應掃除但疑城洞開則大羣仍合高明其謂之何某性稟孤拙涉波已畏而羈踪未脫偶感披心俯炤之誼不覺媿媿幸密存之母洩爲罪案也

答唐毓承

海若之區鯨鯢所窟邇因兵騷餉竭民以盜爲生涯其輟耕隴上聽海波之沸者實繁有徒神君慈母兼而行之民甯其居而海不揚波者老父母之賜東南半壁均受焉非一隅私戴已也不佞竊分餘潤快頌明德誠不勝孔邇之慶而老父又辱惠存耶

答王克承

別來遽復週歲每念仁兄翻覆於江沙鯨噬之中以我文弱禦彼蠻剛勝負之數恐不可保然地有定數官有成案必不至爲之下也而究竟不受其驅劫乎天下事利與害相倚理與勢相煎臨淵結網尙不如負耒而耕之易也況風波排盪蛟龍四鬪豈若几案吟哦之爲快哉狂夫之言智者擇之弟執寸管以與小人爲難亦猶之兩造之爭竭綿力吶口以御沙豪者也人苦不自知兄將反而謂我我何以應聊發故人一笑耳

答張仲餘

兄近況俱悉之宋石弟念兄貧無以爲計其有力可効者試再商之不敢自愛也庭前玉樹數年所望此亦家庭至樂弟率意信筆所言不當天下大計聊不負愧於故人耳何以教我使發所未曾乎地方聲聞閒中採民庶之口以備得失之林惟兄深心解此弟乾坤正氣集卷三百干

完

願聞之他寒溫語不足道也

與吳鬻穉師

一入長安終日塵緣客債課爲公事偶竊暇晷旁及國家利病賢奸消長稍一伸眉言之所謂未大于本倒行逆施甚可笑也平旦清心每自恨不十年讀書抱此空質粉飾甚苦假若再侍絳帷畢三歲之力窮搜今古開發悟門或尙有長進業已置足半途遽難退轉日望老師入木天之署傾武庫之藏耳小疏數千言舍間悉有抄錄可得一指其是非得失之故乎國學蔣君攜得手札大快積想小試旣售爲秋風得意之先賢姪亦青其衿諸門下士各各脫穎皆杏壇間樂事而更祈藥石之訓鞭策之方以俾書紳者敢

詩

與郁念之

辱丈詢詢下訊益以諸品雅惠尤紉故人之誼弟身在網中聊復爾爾寸管作祟兩眼生憎殆非好官利根也丈何以好言譽我哉兩郎君英雄露穎想見聰秀之語筆花浮動此種至樂誰可易此長安俗地愧無佳品爲報容續未了

與繆采星

行時數行遂隔濶如許每次家報都匆匆一函故不及相訊近聞科考見遺甚爲惋嘆豈戰之罪耶抑觀者之賢賢耶遙想上下鄉城往來公私之事定無清心妙緒則雖謂戰之罪可也科舉不足重自當得之所爲兄念者大售之根基耳中年學力此時草草何日收功則三等一番實足爲動心忍性之資吾以此爲兄福兄不可不知福何自錯過也國事家事弟自關心此中有姑夫商量家中有家嚴之主持但得賢兄弟時存一體週旋之念則弟之受貺乾坤正氣集

卷三十一

三

與繆采璧

高明如兄不敢以尋常寒溫之語頌美之詞相溷惟遙想文心之深靜學力之灑脫必有人所濡忍獨見斬然人所飛揚獨見淵止者昨舍妹一訊來屋後之奴儼居新庄高明者亦復爲之乎及問之姑娘采石俱云已必許遣還而特稍爲委曲如不忍殷懃之牛者自非斬釘截鐵具大猛力則婦人之仁吾輩所共不免安能以此遂忘體念骨肉之至誼乎雖然疾徐緩急之間竊以觀學道淺深之候矣望之望之

與趙漢如

兄之清心妙義而不遇國士之知豈好蹠實者不尙虛逸耶然小格之以發兄猛力是亦造物之微也弟碌碌塵中僅博筆舌之爭

都亦無用止如幾句帖括聊供觀者眼中之花究竟成底事業兄
明心了眼應有以策我

上孫老師

歲底伏蒙批答諄至教思藹然如坐春風明月中神動心開又如
聚米爲山谷規畫指授率然有常山首尾之勢也老師以動天格
祖之血誠旋乾轉坤之謨略用奇作正握機入微乃至蒙犯雪霜
夜宿毳幕生聚教訓旺氣遂滿關山直弄狡奴於股掌之上韓稚
圭之膽詎方此也以遼人守遼土以遼土養遼人千古不易至論
彼中情恇怯者視關外爲畏途併揶揄此鹽煤之利此固智士所
笑然三鎮獨無一田而每煩元老之親行者謂何中朝士大夫席萬
間之蔭矢偏見之談大率左袒關撫者好驚風鶴致疑薊撫者實
畏戈矛各各蘊隆於中不覺以仰望之殷憂思之過今幸和盤託

乾坤正氣集

卷三百二十

三

出兩者皆去羣情各安其故衆喙遂息其鳴春防帖然頌聲交作
老師至是直無異同之可計何毀譽之可言某嘗竊聞諸君子之
意迴維十年之前所以皈依宗盟者不啻元祐之相司馬故按疏
一出交口非之非某門牆之私言也老師身繫衆正之望如山之
有泰岱星之有北辰片言袞鉞國是所定知不忍因人而併疑其
地因小羣而併渙其大羣近傳新督時蒙褒獎士大夫欣欣相告
謂休休有容收羣策羣力之雅念如此也不識兩新撫亦足供鞭
策否人有言王帥柔靡貴家輕華子弟時啗血數口老師亦弗之
棄也果爾何不易置之乎進取之議咸願靜以待時然何以長握
必勝之算而不易置之乎進取之議咸願靜以待時然何以長握
之私望不知其難言之也老師幸畧教之某愚昧無所適從但以
嘔吐肝膈爲弟子事師之道然不知關事甚愧于君子惟老師俯

鑿幸甚

與阮圓海

數年契濶纔得聚首掀髯稍談天下事而天人不偶遽見拂衣人情挑伺之故蓋有甚難言之將不知何所究竟者年兄浩然不顧旣已留挽不得無可奈何惟願靜思深念早廻入山之車則天下事尙可爲也情界圓缺多關定命明心了眼珍重此身五鼓夢中不及折柳以此數語聊附古人臨別贈言之義

與楊遽初公祖

京口一別台顏忽九閱月矣老公祖冰心道味凝然如山沛然如兩四方魚驚獸駭而下土波臣書偃耕隴暮歌靜食霜露之餘而不驚其故信齊道者治術之微而大也弟矢口橫臆不足爲吾黨之重老公祖幸指我所未曾使得奉爲南車大發而長鳴之貴鄉

乾坤正氣集

卷三百千

三

新銓固當事者求材豫章多收梗楠桐梓之思然謀之弗協諸君子微有介介魯齋有云自家人說自家話一言破挑者之陰然彼此直諒大見參商今起華匪石俱行矣微情苦口曲而調之化吾黨異同之嫌母蹈不遠之見老公祖倘有意乎敝邑凋敝纔受廉仁父母之賜而遽奪之議從何生也惋嘆不已仕者將謂邑實病令望而畏足老公祖何以爲計倘有可調之以來須相其敏力察其品骨今不審誰爲之署卽如遼餉年年輸將而參罰率不及格好胥作祟何法驅除尙復來兩舊丞之類則邑化爲鼠窟矣吳公祖南遷日費分疏亦敝郡人士一阨也家大人時蒙矚睽感勸於心家兄弟遂擯孫山嘗是一日之短家弟病魔未去不敢重煩提挈獨家兄文心學力尙不後人仰望老公祖之力全而注之沉舟破釜當有以報弟越在三千里旣邀天之幸老公祖以骨肉道誼

昭臨於鄉而使矻矻之苦志觀光無路老公祖必引爲子弟一體之責當無俟弟之控陳矣

與張篤棻

老公祖鬱然之望如水映鏡空見者泠然心善也貴鄉屬有參商銓席虛左借重老公祖提衡人倫之鑒竊幾幾望之昨自一函報謝遂濶疎至今然神未嘗不依依法星之炤也家兄某薄有脫穎之地久沐國士之知而錄考見遺大負提挈將沉舟破釜以得一當老公祖旣不棄之樂籠應不吝其神力某於三千里外獨此懸懸則委曲多方必致之棘闕者尤不朽之啣勒也手足關心汗然布瀆

與曾二雲公祖

弟迂疎自率不識治譜然妄謂神靜者誠必孚源清者明必遠魑

乾坤正氣集

卷三十三

三

魅畢炤之謂才魚鳥不驚之謂德俗吏馳騫腐史牽拘皆非質也老公祖淵然澹然而凝以如山之力四國載甯一之休羣魔息飛揚之炤凡我父母子弟頌聲日來一時仁明公祖交相與以躋至治也顧司理遷不副望不知誰何中傷乃邑父母且遭投杼畫語過南誰爲爲之孰令聽之不覺爲下土恫焉老公祖定悉本末願開其蒙顧念爾時落落晨星署且莫借彼耳食者以下土爲悔地則柰何敝邑之民瘁矣日供騷役之不暇而竭土之毛剗心之肉大半爲胥鼠所啗幸新緒方清今又已矣嚮者再一擾之未卜所究竟老公祖幸時懸之心目庶不終痼乎試事媿媿陳賔宿昔友生誼無可己不暇顧言之行否然憐才佳事援手非難老公祖勿視爲尋嘗竿瀆而愍冥之幸甚

答宋鹿遊

諱祖舜淮安守

淮海重地蛟龍所居民貧而易動也人正乘釁鼓浪翻風具有隱憂在幸借老年丈壯猷坐鎮惠澤旁敷銷窺伺之雄心返哀鳴之鴻雁東南半壁咸受安瀾之賜焉催科撫字昔人所難調甘劑苦仁人必有仁術局外者蒿目而憂真不知所計區區管見惟有緩舊逋以勸終事老年丈以爲然乎附懇敝同門丘義軒年兄竟作古人言之堪慟其年伯在堂有子雖青其衿而孱不任事老年丈幸垂情覆露破格提攜之吾輩年誼應於死者篤厚望老年丈有同心也

與綿貞公祖

託在宇下獲有桑麻雞犬之安旣已如天之覆矣典刑在望正氣嘗伸稍得竊春秋袞鉞之餘一抒狂瞽然岐中之岐忽有發於意想之外音水火旣形羣邪窺伺老公祖聞之得無有隱憂乎璫熠乾坤正氣集

卷三巨干

書

方張內外交結魚肉我下土之殘黎老公祖爲民請命天聽難回則吾民之厄也可奈何第願徼福星之炤雨暘時若枹鼓不驚父老子弟安枕而卧則劊肉醫瘡無所復恨惟是舊逋至踰五年理勢誠難兼督調甘劑苦地方爲政權宜而畫一布之以絕胥吏漁獵之端飲德未有涯也老公祖倘不廢莠莠之采乎敝邑廉令忽以議奪今誰爲署之奸胥窟穴侵蠹萬方積漸以往將不可問乘劉父母情緒而早調一精明英敏之才以急治之庶猶可救老公祖留意地方知無俟某瑣瑣也

答蔣澤壘

年兄行後自圓海入一變爲疑城自圓海行又一變爲敵國初以工垣之推生圓海之疑繼以臨川之難各致疑於圓海弟虛中觀之二者皆過也臨川謂雲中也自是一種意見恐不關於圓海圓

海夫亦豈忍至此特鄉匪石調而魯齋帖月吾輩人也乃憤憤生
疑漸不可解中細人之挑激至使兩正人無端蒙其毒閔墻召侮
豈不可爲痛哭哉今羣議解紛未知解得與否而事端將自此開
矣王安二字又殺一人一人不足計恐憂在世道病在中涓禍在
精神漸不知所止耳如此景象安能脫然如年兄驅省方之轍哉
福清去志頗決高邑側目者衆坐席未穩僉堂且行矣所幸秦中
諸君子風流不墜尙可撐持如與貴座師相聞幸力以轉移調劑
之責屬之若江右二三正人反覆不已則先進者不得不任其責
也

答錢牧齋

官府隔絕惟有講筵一脈稍通眞呼吸非具學識才辨精誠膽力
者不能收格心之益以此望翁之入爲世道計甚大非一人之私
乾坤正氣集卷三百二十

書

言也邇來同志分曹元黃已見太阿倒授將有清流白馬之憂幸
孫老師甚膺天眷入關可期而居中斡旋尤亟亟于翁臺是望東
山之履幸勿久淹若向來持議之人聞已虛中無我不必望念也
不肖拙鈍驚下不能爲吾黨絲毫損益舌短心長面墻是嘆倘翁
臺進而教之或終不至貿貿耳拜命之辱跂足以俟

答門人朱子潔

武侯云學須靜也才須學也澹泊可以明志甯靜可以致遠每誦
斯言輒爲神悚古今豪傑不能出此數言僕根器淺薄學力不到
意於靜淡二字守爲涉世居心之本而塵務相關失其故我筆舌
交迫迷卻眞詮忽接芳訊知築室靜修隔遠城市頓發起予之嘆
嘗謂才士之致可以剽名文人之心可以學道以兄之才之年之
文譽而高謝時趨晤歌一室何論文草吾以觀道力矣勉思此意

守而勿失竊因下問題齋額曰靜清愧不能大書聊以塞責簡讀妙義知心清而機靈風格道上無此子脂膩之氣更願挈其大提其脈勁而正和而澤總之清心所入自有真境非他人所可告語也

答沈雲升

向聞茶差爲僂羨年兄之僂僂也曾幾何時而風波鼎沸對面如山人多鬼域之心步有荆榛之掛然後想僂不獨茶差凡乘驄而出超然於是非之外者皆僂也弟不得年兄之靜而習爲懶不得年兄之徹而師其心方且束首新差尙有數月不得去勢必至顛躓而後已孫老師聞有進意雖中外尙有異同然可翹足俟也總之都中之議日變月化不可預設成局只看秋夏之交恐變態尙未止此年兄靜觀之餘何以教我併爲吾黨計乎

乾坤正氣集

卷三 三 三 干

美

與魏廓園

吾輩疏亦復如此不必言矣今萬一可爲者在兀卿大臣之疎而太宰且杜門求去安得戶部有韓文爲之倡率耶此時言去不謂避言乃近於避事事已如此三十年重名須有結畢之地年兄素以道義爲太宰所重此事須一激發卽言之不行事君愛友各盡其道而已年兄以爲何如幸密商之弟目小苦故不得卽面晤偶閱劉瑾時事蹙然而起以告知已過三日卽無益矣

答李緝敬

纒拜鹽筴之教又奉激揚之牘民之剗苦分甘吏之拂肝洗膽儘覺學道者仁術自妙而信心中搔癢都靈台臺之剗寸丹以灑秦晉之墟者孜孜不厭如此弟坐困長安車塵泡影每披讀大疏一字輒意赧心飛也法星西去正論孤危翹首鷺洲空餘神往

答許約疎

老父母高懷曠致當於清風明月中置品憶往歲在清涼坐上識
領光霽則亦時以清涼意境想鳴琴之韻不意民有清歌朝施
墨錮吳山吳水應笑廉吏之去亦聊以去後口碑明敝鄉之民心
尙在也意者清固造品亦違世法乎論久自定謹伸舌以俟榮分
布破之絲謹效締綌之報庶幾我思古人之義不敢煩稱以瀕大
雅

與毛禹門

昨忽聞太夫人之憂慘然動色卽擬走數行弔問然猶妄意事機
可圖環召不遠且曲商善覲以得一當不意大璫旣持於內福清
又口期於外卽太宰一片熱腸不得不觀望慎重乃小人交通大
難先作同文有獄直道不行邵上葵之流毒再發而後憤兵交起
乾坤正氣集

卷三百二十

毛

今日之事不至二正之季不已者弟將駕山中之車從仁兄後矣
若使天牖聖明大奸鋤去則吾黨可以吐氣而仁兄彈冠之日也
然向者之毒發之浙猶可言也今發之江右謂之何哉仁兄虛明
冷覷何道而可要之弟亦過計矣卽霞城恐亦在餽飢間未知作
何結局辱仁兄惠存發此憤懣洽寰諸君子皆行矣世道否泰眞
聽之天無足言者素絲一縷伏惟莞置

與蔣澤壘

前字奉報想已入覽嗣後互相觀望彼此調停意求少靜不意髡
鉗亡命等語出而佐鬪兼內禍日深卒不可解激爲相爭之勢於
是副堂之疏一出公論爲之一聳彼中甚忙卽陳居恭且出疏以
參璫而他可知也總之事機旣發要地絕無有應手照顧之人年
兄試觀邸報與一切旨意槩可知事之究竟必至二正之季再見

於今日耳又何言乎時事如此可憂甚大局守長安如在船檣中一聽風波搖蕩然後想持斧乘驄之快也黔撫出疏自辨而不發抄近霞城於齊中諸公手覓得刻冊大是放恣然匪石考功覆疏已爲平情之語渠意亦倣年兄功過相準之意有罪疑忘過等語似亦不必煩參駁也意於功罪大凡中帶一二句足矣年兄以爲何如僉堂意欲行太宰更書不肯留此局不知應如何收然年兄可一言密教之

答徐若谷

上谷重鎮畿輔鎖鑰台臺以旋乾轉坤之手矻然爲萬里長城使碌碌書生安枕于此皆明賜也卿雲在望鈴柝相聞廟堂之上風波滿眼台臺憂心世道倘不吝一葦慈航渡之彼岸乎貴鄉道德節義之風甲於天下不肖沐浴餘潤依爲斗極豈特并州之念而乾坤正氣集卷三百二十

庚

已台臺收其夙尙則幸有以教之

答夏緘庵

台望隆重早借分籓爲一路福星此當事者循資采望本有同心不意淮海多故舊者復留再三商榷乃移江右總之以道德之鄉處第一流人以竟從前第一等治行竊爲并州額手慶矣家大人村居却掃特承惠問故人高誼銘佩不忘然此硜硜者實家大人之教也朝四暮三其謂之何來賜謹以璧返統希宥其不恭但萬二生極感鼎力昭雪鹿洞生光台名當與紫陽並傳矣

答王洪崖

諱道元廣東副使

台臺洪猷亮節壁立于尋海內正人仰爲山斗固非一二含沙之口能鼓浪而挑戈也嶺表重地正借福星坐視澄清之烈益懋建牙之望彼人已斂翼而歸殆不煩過爲介意韓正老乃吾輩正人

且與家姑丈宿契俟其入時一解之不敢負惓惓之託也

答魏元白

諱光緒山東按院

讀來教殷殷世道之憂乃長安鼎沸而台臺蓬萊閣上仙仙乎湧日吞濤令人慨然有乘桴浮海之想今而知人間險幻不在大海茫茫只此陸地奇波漸成蟻穴方謂靜以消觀釁之熱腸猛以清憑城之深窟而雷霆忽下狐鼠方驕折檻無能掛冠有志獨恨不早得補浴之手探驪珠而掃妖氛耳

與錢梅谷

向在南康有一府學訓導王之臣貴州人甚有超然意極於白鹿洞中禮重之後轉貴陽教授十月圍城督諸生以死守乃圍未解而已劣轉兩院雖敘薦以卑官寒冷莫爲昭雪頃其子亦以明經應試持疏欲上曾爲達之貴衙門陳公祖竟不之許但念今天下乾坤正氣集卷三百二十 充官爵冒濫功賞混淆彼一老明經受圍城數月之苦能倡率青衿以死守之義僅以循資之故使曳裙侯門真可憐也此種情事似與妄自陳乞者不同台翁倘可爲一言使達天聽乎想仁人君子有同心也

答孫六吉

恭惟老師以正法眼觀下界空華直提人心膽於月鏡中魔障畢消狐禪始破塵飯土羹者更覺無處活此亦敝鄉俗一變至道之時也從來公與明相須而文與法自合精氣所通神明爲動況於握槩磨烟之士乎績望峻卓榮膺特簡不得久借麟鳳之章然數十年間敝鄉有棟梓之遺則皆誦明德於無窮也某硜硜爲性直於邪正消長之闕茫乎未有所窺聊復狗臆妄言耳今雷霆時擊狐鼠日驕內外之變隱憂方大拭望老師還朝展補浴之手作中

流之柱國是世道何幸如之瞻戀宮牆不勝耿耿同氣之懷未敢以私瀆也

答周綿貞公祖

異同之言發於吾黨流波激電遂張中涓之焰所謂楊墨慘於洪水信哉言也中外旣已分曹是非從此始定小人之網或未易張也今發難者去矣化異爲同似乎有機安得且晚聽履聲之入使紛然者望斗極而止其所乎惟台臺教之不敢不竭駑力以從

答吳石渠

年丈品力吾黨託寄甚深非直爲一時華要而已當事者別有宿心持之堅確故不遂所願然留居瑣闥出大手眼以驅邪指佞尤世道大幸也爲期不遠努力前修若時事尙可支撐不遂掛冠以去猶可俟飛鳥於長安傾倒數年心期耳

乾坤正氣集

卷三百一十

早

與宋一衷

諱師襄

年臺持斧而出澄清畿輔且舊遊之地吏弊民情可炤燭數計也乃中朝議論忽復紛紛而雷霆震驚豸冠走死可爲班行短氣年臺聞之得毋拍案而起乎井陘道王君弟與共事江右甚知其才品如玉之粹者也年臺留意拂拭之砥柱旣移吾黨遂無領袖言念近事惟有軫鬱

答楊蜀亭

諱金通丹徒令

敝鄉得歲愷悌君子多辱而臨之然屈指卓魯未有不首推老父母爲東南半壁之冠者驚濤屢作正見安瀾非老父母妙運深心不知張皇幾許若經緯之緒冰玉之標固非贊嘆之所能盡也山公坐上拭目以需不盡種種

答周綿貞公祖

敝鄉凋殘已甚十室九空蓋不俟水旱爲虐而皮骨將枯矣幸邀
仁人之賜甫脫呻吟漸有起色乃生之不辰造物者復沼而魚之
引手而援是在老公祖惠澤從心再見富鄭公之芳規耳賑未敢
望蠲亦須爭若停舊逋以母爲民擾則老公祖可以便宜行也擬
俟勘報公言請命然不如老公祖之一言九鼎伏讀大疏所謂仁
人之言其利溥哉有焚香以祝耳

答張燦衡公祖

弟習爲外吏每謂官評長短惟地方知之最真故不敢以耳食之
見短長外吏若碧山劉公祖之議蓋先得此心之所同然者也前
雲間之舉本以士民之意而貽累賢郡守以行蓋垣言其所聞老
公祖言其所見公論昭然老公祖何嫌何讓遽思棄敝鄉而拂衣
乎覆疏蓋屢促之祇以太宰杜門百事擔閣咨已隨到隨復今部
乾坤正氣集 卷三百二十

望

覆已奉明旨矣以部遲非本衙門遲也老公祖持斧澄清敝鄉方
有雲開月朗之色卽報滿期迫何妨請寬且敝郡五邑三缺其令
所籍於老公祖之釐剔者以日爲歲萬勿孤雲霓之望也水災再
告民且爲魚仁人君子惻然動念知不俟詞之畢矣

與蔣澤壘

月初卽草數行奉訊未得便發一閣遂二十日可見長安之混也
然時事亦不出所料今萬元白奄奄一息生死未卜林心弘之逃
大爲衙門短氣昨土光亦杖發矣了此一案全是太宰之力雲中
已丁外艱大抵從此可以靜矣魯齋帖月爲茂明所轉都有化異
爲同之機亦世道之幸僉堂纔可留而副堂又有必去之勢若留
得太宰則可爲也終日騎馬而待漏則坐於松棚聞諸璫方以武
廟實錄進則禍未知所終殊生掛冠之想年兄何以教之

年兄以絕頂精神做出絕頂好官龔黃卓魯復見今日移地易民不過暮月可以分簪前者加銜之議不敢力爲贊決者吾輩但討一分便宜便有媒孽者居其後孫恭甫年兄所以被此者亦以加銜爲之祟也功多賞薄乃有餘思年兄以爲然乎長安光景大抵是二正之季士大夫之憂末已卽社稷之憂也方發掛冠之思年兄何以教我

答趙芝庭

諱脩昌曲周令

側聞老年丈妙手運斤清心茹蘖胸有成竹目無全牛畿南卓異之聲無不首爲屈指者夫今之令亦難矣催科則病民撫字則病官急操之涉於釣奇緩繩之易以滋蔓使安焉習焉雨濡風蕩而不詭不驚者此真治術之妙也老年丈殆近之矣旣爲第一等令乾坤正氣集

卷三百二十

望

自有第一等官公論自在翹首俟之

答詹狝南

諱應鵬嘉興守

嘉禾爲浙西重地非深心大力未易妙入人心老年丈淵然止水挺然孤幹恢恢遊刃定有不言而使人意消者下車未幾先念故交遠馳翰覲見之欲汗也弟拙疎自信碌碌如人已覺鼠技之窮空灑杞憂之淚老年丈何以教我乎

答胡泰六

粵東之變紀綱掃地國家二百餘年未有亂民披猖一至此極者豈特一方之慮實關天下之憂自非老公祖文武壯猷剛柔妙運定亂于呼吸之際決機于緩急之間則禍不知其所終矣二千石自失民心持斧之憲臣何罪彼中士大夫自有公論廟堂之上自有處分總之紀綱爲重義不得姑息亂民而始禍有因亦不容混

清國法讀大疏再四情法曲盡似無以易之矣

答饒業明

諱景暉廣東籓司

地方之變固云意外然釀禍有本縉紳之口不可諱也握兵者追其罰而旬宣者分其咎是豈情理之平不佞竊劾一言云身在內而閉戶不納是爲畏禍身在外而開門揖盜甯無後憂今臺下焦頭爛額矣又何罪焉以風紀之故而苛於共事之人要終不能倒翻公論也做衙門行有持平之議臺下亦且靜俟之耳契濶之懷實增惋嘆矢竭區區不敢靳也

答門人饒得渭

緬維高韻與日俱長發久閱之光以生故人之色蓋屈指計之獨未饒文心道味竿頭之步去阿蒙幾許以此耿耿耳粵事大爲駭人波及尊公尤爲悵悵情事曲折昭昭耳目掩面入心者固不能

乾坤正氣集

卷三十一

望

以一言操功罪之衡正自無煩過慮主特公議者應且有說耳長安如沸璫禍不減於亂民僕方履虎尾而想掛冠不審得燒燭以待良友之至否先期就道神靜心閒亦戰必勝之道也倘有意乎

答王中詡

諱永吉定興令

每從薦剡中想見芳標清韻超然治譜之外其自驛車來者又無不口頌仁風燁燁聲光梓里生色幸以立水抽繭之意懋勉前途吾輩有一片血誠入赤子腹中則神明鑒之豈有不能動物之理託在同心固無敢不竭也

答劉秦望

諱斯峨海澄令

猶憶明衡年兄在銓署時問其將來之秀於老年丈首屈一指弟每藏之膺聞明衡非妄語者也老年丈芳聲卓政有口共芬今居波斯在藏此亦吾輩亭亭獨上之地海上之民習於污政一沃以

清風孰不冷然入心也仲惟勤勤下問此爲芹味可以共享老年
丈定爲發一笑也

答吳本如

都下囂靜閒忙一視兩關爲動息台臺仗鉞臨邊風雪在心戎索
在手虜銷跳梁之威奴寢潛窺之志如韓范偉望河陽壁壘自應
不同乃其大者尤在輯和文武捐除畛域每做座師從關上書來
輒嘆服台臺淵妙沉雄不啻口出而撫臺規畫之方率受鹽梅之
劑是又在台臺善治而成之夫封疆大計最患參商遼左淪亡此
爲病本不肖遇迂無似然從不敢妄談遼事自謂多指亂視故矢
不犯此一段罪業顧管中窺測每欲以此言相告台臺深心神力
廣益集思尤喜聞芻蕘之說者也辱忝通誼故敢布之

答吳亦臨

乾坤正氣集

卷三百三

器

猶憶途次一晤芝眉至今耿耿於懷也年丈卓犖孤標珠圓玉映
而久淹墨綬兩地琴清書最之方新則峻擢之在邇所謂觸邪持
正朗朗日星之章固年丈事也弟庸庸何堪當此乎有翹首以望
飛鳥之入長安耳

答瞿芝遠

大府劇地才足以運力足以擔精神足以周徹而又有矯矯自異
兢兢恐墜之念以提之則愈劇愈見利器耳年丈具此數者與運
斤成風何異況以計典爲言何其謙抑之至也念省會重地如可
題留亦屬便計萬不必以此中爲念

答蔡孝來母舅

長安捱日每喜家訊之多而輒懶於作家訊時一舉眼卽想見母
舅蕭然之趣然通候之贖落落乃爾亦恃有迹外之鑒而已於青

門年兄函中啟得手教爲之快然福祉盈門他無所念衣食之計水到渠成卽俯首而思亦未得其方小事尙爾況欲高談天下大計哉邇來走馬漸慣獨苦舌不能結乞歸之想且夕不忘母舅何以教之元老偶有人言昨已爲之曲致然千秋公論不必以口舌爭也現聞何以久不來館閣中梁纍橫金腰玉而磨澁持於丘壑世道大略可見吾鄉水災光景定惡有救荒之策亦望示之可以入告也家訊一函乞爲發去聊迴平安二字而已

答申青門

尙有報函已悉別來欸曲適接手教又如晤對一番亦旅況蕭然中大快事也令伯年翁沉識雄才共倚爲封疆之重啟事已駸駸上矣微聞有關門之危爲擬議者而言者忽出殊爲惋嘆以目前用人之故彈及九原論定之相業弟尙未諳往案一讀令伯大疏乾坤正氣集卷三百二十

呈

如矇斯啟千秋公論自在詎足爲令伯累乎病目口授不盡耿耿惟年兄亮之

答申元渚

邊疆彙卯急需旋轉之才老年翁沉雄淵妙聚米爲山谷使人躍躍有尺組繫天驕之想乃明綸甫下旁議忽生凡在知交之末共深多口之嘆悠悠煩語不足爲老年翁白璧瑕第索及三十年前金滕之案則九原有知甯無太息甚矣議者之苛也伏讀大疏瞭若指掌急尙做同咨鳳毛年兄婉致此意渠已首肯却不意鄒瀘老之有言然總不出此數言之外老年翁第靜聽之所謂不辨自明者也千秋青史一代人心要豈以目前筆舌爲據辱大教之及敢布縷緘

答陸衷涵

長安聚首悠悠可思機緣偶阻仙旆南還殊令吾黨有索寞之恨
然璫焰方飛縉紳短氣吳山吳水一年逍遙天之所以厚年兄者
甚至不須羨秃筆招殃也太宰方欲破格用人遂不能安其坐今
格外所增暫爲新選君出頭之地也年兄青鎖鳴苛正好穩夢但
預辨數篇大文章爲整頓乾坤計耳申元老忽掛多口殊是意外
然總屬前人舊案不足爲累也一函幸不浮沉何當爲行李之累
偷兒眼小覷此空函豈家書真抵萬金乎一笑

答陸足吾

年丈行後正氣遂衰一切國計民瘼俱無人得其要領吾鄉落落
兩三人尤覺孤弱不能與秦晉齊楚爭盟若何武老之再造危疆
功存國本僅得平平一轉而吾輩已覺力竭氣盡矣此亦孤弱一
也年丈早著鞭事更有大於此者官府參商仁賢浩歎豈年
輩坤正氣集卷三百十

吳

丈優游松菊時乎弟鼠技方竄白雲在眼不知能坐候使節之人
否

答白惠風

諱貽清

縮綬黃堂風行千里自是吾輩實在經濟事業等而上之猶屬隔
膜不親況如弟空言無裨安所當萬一平張弛寬猛之間斟酌布
之而毋護恣睢蠅營之吏於下二千石之責盡此矣台丈妙手精
心宿有高譽知新政卓冠兩河欣爲梓里生色若區區郵使小誤
五實年兄自不作此俗見也承命卽爲致之不煩介意

答楊大豫

諱方盛河南按院

長安聚首正賴同心之雅今年丈持斧南巡地居四方之中央則
澄清一方卽所以又安天下固不獨兩河拜賜己也但吾黨落落
又見元黃之血每思脫離此地而羈局不了遙望驄馬之行觀風

問俗不啻仙境至地方治狀自無逃於冰鏡中弟夢夢不善鈞索
實忙然無以答下問之雅若此中近事只大家求靜耳看吾黨福
運何如年丈高明之見幸有以教我彰德白守敝府之卓然者也
幸炤拂之

答鮑上海

老父母治行卓絕有口能言有心共曉無俟不佞之微塵濺沫裨
益高深也理人之方甘苦自知與民之分甘茹苦者知之區區菟
羹乃蒙俯采尤非其質然以見仁人君子孜孜求瘼之心矣巨浸
稽天吳民其魚老父母德政所感海若效靈聞瘡痍未如往歲果
何道以致此

答何武莪

台臺正氣膚功昭垂雲日迴翔兩粵共有賺賺之懷然內之坐嘯
乾坤正氣集

卷三百十

聖

畫諾所謂虛名便計從來大經濟之手牽以鎮撫一方歷年久長
乃得盡展謨猷建不朽之業且達觀世局欲速其功每爲小人藉
口惟君子退守一步則人心轉有餘思正氣亦覺綿遠台臺之暫
留甘棠舊蔭也萬木宜動東山之思使不知者以爲介介也肝腸
之私敢效他山台臺其俯鑒之伏讀加派疏冊爲民造命爲國奠
本使今日有十五人心台臺之心而彷彿良法美意以行於天下
何至騷遍窮黎此固不肖之所神仰而舌甘者也何敢愛焉

答金稠原

諱世俊

清風朗月輒深元度之思每念世趨凌夷人心波蕩銓政幾於濫
觴道宜受之以節乃可以通士竅而疏其壅然乞者或未滿志焉
山公座上清通簡要如翁臺者指不敢多屈而以此小同儕之事
茹蘖不吐飄然高謝不獨明厚亦將砥世也相知每共嘆此義引

領羽儀之出在旦暮間耳弟孤拙無所短長心之所存不能畢達何意耿耿者辱鑒信於千里之外耶

答楊大豫

代函纔報俄接嗣音弟於諸兄弟中最爲拙而孤懶而廢其何以承下問勤勤如此然弟於中土治狀實未有聞從此當時時博訪以備芻蕘之采苟有所聞不敢不密以奉告也邇來議論少似靜平不復爭水火元黃矣此番舉動所傳聞者多出意外然不關吾黨相知則亦付之度外而衙門變態查出又有孫堂翁之變真可浩嘆也貴屬推知治行卓絕而風格不凡者鑑衡定有別得可舉其名見示否餘無足爲年兄道弟亦十有五六杜門不出總無好光景也但望文場監臨如雲中絳仙耳

答陸鳳臺

諱完學福建布政

乾坤正氣集

卷三百一十

哭

景仰有年矣宦途修阻無緣識荆敷歷之偉望峻卓之芳聲私計粉榆光耀建牙之指者實惟羽臺是賴邇者八閩莫安紅夷底定則經緯之績居多雖計前啟事方議暫停而公論所推要當超乘或需次撫閩或先陟卿寺當事者正有商量自不敢後駑力也伏讀條教露湛霜明國計民生可謂要言不煩矣以此實心實力仔肩天下大計何事不立何蠢不清仰窺淵妙之藏必有燭炤於四方之故者其亦可傾儲而教之乎

答楊遵初公祖

向有一函馳候想已徹覽近聞巨浸稽天民且爲魚所恃仁人德政活我災黎此中正竭綿力共爭改折其弊急要着全在按臺公祖勤疏幸老公祖鼎力促之敝邑十有七潦近在炤臨之下尤望破格爲民請命近武進議留卽可以青陽移之敝邑業與當事者

言之未審得從所請否長安變局日多弟以拙直貿貿而行殊愧無所短長老公祖何譽之過也宇下之庇已宏而遠益之以翰貺更令汗浹附有一絲爲獻亦野人之芹也

答沈雲升

年兄行後吾輩遂覺孤寂又當內外水火之時語嘿兩難官命如葉眞使人望巡方使者如雲中仙也執法除殘觀風問俗步步是實際事弟正悔擔此虛差却於驚背混此歲月年兄何譽之過也人情險巇議論亦滑正使浪息波平原自天清日朗年兄虛觀近事且謂之何其有可以教我否靜長年兄治行既已膾炙人口學道自其本分容與意白年兄商之種種欲言筆不可殫

答田陸海

諱唯嘉浙直鹽院

老公祖正色昌言主持國是屢折璫燄不避櫻鱗同志者方望爲

乾坤正氣集

卷三百二十

吳

領袖卽邇來盈廷請劍猶是老公祖餘勁也何云不合時宜哉弟孤拙無似碌碌猶人老公祖以宿愛之故而過譽之愧矣愧矣敝鄉凋敝之後重以商羊爲祟民且爲魚菽亦不飽當事者按畝責賦欲舉從前救災成例一切廢格恐洵洵思亂吳越間將無甯宇老公祖握兩地之命脈爲民造福端有厚望仁人一言百世之利也楊遠初公祖端嚴敏靜吏弊民生洞無遺炤今舉望日重遷期不遠尤乞老公祖爲地方借寇完此救荒大政倘有意乎辱承手翰故敢率布

答周老師

久無便羽遂隔冬秋近從命令親拜雲中之札併悉吉履及太師母襄事之期正擬抒辭作輓一申門下士私念忽枉台命屬以傳信之言某不敏以餽飭小業受國士知而今腕膈間積塵落暈且

忘之矣况號爲古文辭尙未能絜字切音顧欲執筆誅行哉伏讀
懿略瞿然下拜實深篤行先民有道仁人之想不獨景閭範而式
聖善也附塗歌巷嘆之後託姓名以不朽言卽弗文豈非快事要
以機絲雲錦易蕪穢之言碧玉文犀飾瓦礫之語師命則重愧拜
何安至白毫穎秀實分夢中之花庶幾向管中乞靈以不大負明
命未知筆神見許否耳

又

長安之局正在可解不可解之間一時意氣相煎猜嫌互起總是
聲望皎皎之君子各有獨登壇坫之意而事會偶有參差人情又
多挑激遂使剖心立血之交情忽入深雲迷霧之變局卽圓海年
兄一去雖有微情亦爲人誤今喜亂者借以爲題好事者蔓傳之
謗吾輩平平澹澹何樂有此豈非氣運乘除君子亦有不能自主
乾坤正氣集 卷三十一

辛

者乎今波浪少平全局尙在所難言者聖躬孤翳特甚左右伏莽
方深昔人謂參政他日之憂也老師能終以度外置之乎葉相公
怏怏而行怨尤殊甚彼謂調停已苦而公論遺議紛然要其病根
獨不釋然於南昌波及禹門兄陰厄其出機會屢失可爲嘆恨老
師且幸秘之某向出口見憎不知何緣獲戾若復言此又增一重
罪案矣吾鄉水災正在力爭改折不審得從所請否急候按臺勘
疏老師幸着力言之爭十纜可得五也台諭饒父母廉明爲一時
冠己心識之不敢不竭齒牙之力諸門生漸次出都今只寥寥兩
人林門生聲望甚佳老師時一提撕之則他日同心之一助也時
事日難頗切歸思老師幸終教之

答程徵源

諱正己保定巡撫

恭惟台臺皎若鏡懸淵如水止吏民之利病直須坐炤兵倉之單

價何難巧籌乃虛懷不居殷殷下採夫罷餉留兵則此五千人者向豈有量沙之術乎抑別有醫瘡之法也財盡則議銷兵烽急又思抹馬多與去甯有擇焉權緩急之勢而謀分合之宜問疲冒之籍而簡精銳之旅蓋書生勤見不過曰少勝多實勝虛耳局外何知短長惟台臺精核而妙運之并求向者所以留兵而罷餉之說也狂瞽嗷嗷以發高明一哂

答樊鍾陽

諱尙燦兩淮鹽院

今天下竭澤而漁賢愚共嘆似乎舍赤子之皮毛遂無點金之妙手然猶是鹺政而入年臺之擘畫何處生此五萬之羨七萬之抵也天下事不得實心實才以爲之其腐敗金粟而枯竭脂髓可以數計乎從來經國名臣原無奇方神力如此苦心如此通變如此先公後私則旣盡之矣弟愚亦有心拙無所效捧讀大疏祇有額

乾坤正氣集

卷三百二十

至

手已耳

答萬拙庵

諱谷春吳縣令

老父母逸才慧炤幾於遊刃燃犀而冰操凜然勺水不飲此治民之所交口而頌者也方今災沴頻仍民窮盜作朝端日見紛岐內外正當水火民生國是端籍老父母入而主持之不佞碌碌無奇心長舌短其何以答有道之譽祇有愧汗沾衣耳

答卓嘉定

敝鄉不辰遭此巨浸所賴仁人君子引手不啻起白骨而肉之也伏讀台諭奔走污泥問饑賑苦字字日暖春溫從此民不知災矣昔人謂救荒無奇而程子謂一命之士苟存心利物於人必有所濟通此意行之動念具有化工出手無非生意未有真心真力竭而澤不下暨者也老父母聲聞卓然德政不勝書偶推目前一端言

答鄒靜長

手教再及談甘州事如指掌卽聚米爲山谷不是過也邊疆之事如此使弟長一識矣擊璫之局草草而敗幸得支延目前而側目者方深亦聽之耳居此一官殆非計生死毀譽之日也

答陸景鄴

當今經世之才目之所見心之所許實無居台臺之右每向相知擊節非敢佞也貴陽危地乃大手轉旋脫穎而出之會頌豐功偉烈者將滿天下又豈俟某之三寸舌哉台諭屯種鼓鑄悉經濟實用根本先圖而歸於減以求精此一言者尤救時急着居邊境者槩不肯言亦不肯爲每念封疆之事難以臆決不敢浪置口語台臺以一旅一卒定前人之案則成敗利鈍之數瞭然矣內之所申乾坤正氣集卷三百二十

五

答張燦衡公祖

敝鄉荒陋之區老公祖法星炤之朗朗乎耀於光明之域矣洪水爲虐一望泚然漂廬沉竈之嘆啼饑號寒之聲老公祖耳而目之繪鄭俠之圖以獻而當事者以爲謾也行且加罪於鄉士民弟某輩從此緘口矣仁人之言業心拜之庚桑畏壘百世不敢忘老公祖也

答董見龍

諱應舉

兵興以來民力已竭當事者尙仰屋而歎每見聖明一番發帑卽

滋一番盜騙從未有費省而效多如台臺之屯政者台臺經緯之妙仔肩之力實以謀國苦心拮据從事故荒郊變爲沃土勸農卽以養兵其實心快之不禁舌之津津也豈足裨高深萬一乎屯事惟廣惟勤惟久乃克底充國之績台臺尙堅忍行之以紓國計之乏此滅奴第一根本計也台既誼不敢自外然以新設之節有捉襟之勢一絲一粟皆在區心節縮中何當捐俸以賜乎敬心佩之完璧以返

答李緝敬

不肖謬謂差無仙凡視其居之者何如耳台臺持真實心發大願力炤之以白日拂之以清風吏洗其腸而民飫其味台教所謂行所無事則真吾道之仙法也台臺心可自信而人亦無不爲台臺信學術事功俱在不欺兩字中而獨一方祇福哉不肖皈依有素

乾坤正氣集

卷三百一十

五

正籍箴銘乃台臺將以例讓其如同志之主盟何

答李若鶴

慈邑宿稱劇地非運斤之才未易愉快也每聞品望絕羣而上如百鍊精金浮圖合頂豈憂罡風吹墮哉弟最以疎拙自信黽勉支吾所望同心早入正人生色耳

答劉康谷

近從德化令君便郵附有荒函奉候想已徹覽矣老父母苦心苦味士民知之當事知之所不知者一二含沙之口耳棠陰不改槐路方長終當爲老父母白去後之思何況計典斷無吹毛碎璧之理也老父母不須介意春風北上拂席相俟彭澤酒錢不敢覲拜惟台慈炤察

答程肖莪

諱紹河南撫院

恭惟台臺志在憂民道先濟世風雲變色樽俎盡是甲兵雨露從
心鴻雁皆歸樂土蓋中原爲天下之命脈而台臺作四海之斗杓
澤豈在于一方功自關於社稷昨者進璽大疏獨著儆戒之詞大
破貢諛之習迨觀盈廷之諾諾益想正臣之審審拱聽履聲以作
柱石某空有愚忠苦無佞舌方轉喉而觸諱輒望若以捫心何當
下問之殷更沐百朋之錫永懷明德可任瞻馳

答李大衛

諱思啟浙江按院

驄馬南行風清兩越每讀驅殘黜墨之章稟有霜氣至憐惻民隱
繪圖請命藹乎仁人之言也台臺之造越者至矣早望還朝主持
國是將梓末徼有餘庇正恐孤踪已還無緣再領塵元耳

答吳茲勉

諱之甲浙江督學

老公祖文心慧炤迥在天際俯視凡界直懸肺腑而獻之區區模
乾坤正氣集

卷三百二十

番

索妍醜較量短長不足道也以九十日盡兩越三試之秀如風行
電過十不失一方今相士之神不得不推老公祖第一矣文衡所
重教化攸關越士囂而陰術亦善變以老公祖之陽明孤峻明表
而微導之必有道術入人之妙竊洗目以觀成不敢哆頌前美而
己某方顛直見憎勃有尊鱸之想吳山片石仰望真人紫氣未知
緣法若何猥辱高雅倦倦敬謝大德并布依斗之私

答王元珠

瘴地僻遠人所意厭而翁臺凝神單慮以居之霜月高懸夷民靜
謐勞苦績奢詎他方可擬矧孤忠環召久在馳驅人心未能甞然
要以衆木飄零之時尙有疾風勁草挺居天末則吾道有人同里
生色所望旦晚還朝砥此狂瀾耳何武老有國本邊功抵餉三案
方在推轂間事忽中變正恐以儆郡爲累不知遲速何如葉父母

水清山立剗心愛民真一時首出斯民直道與緇衣好德正自不能己已台教蓋先得我心者逢人說項早已竭此寸舌矣弟孤踪踽踽抽身無路每懷大雅何處晤言臨風悵惘

答門人余未之

每懷清晤夢在長松白鹿之間偶一扞眉談天下事猶往日餘緒也何日北上潑茗煮雪助我靈心浣我塵面乎勿久作兒女戀戀也近見賢書故人寂寂母乃爲彼哉所笑寄語諸兄宗風未墜吾道不孤勉思進修以觀後效傳兄并道耿耿

答寇禮亭

諱慎蘇州守

治儆郡者不難風馳雨驟難于霜明日皎要使人恬于理俗息其囂谷有恥浮薄而勉忠厚之意則至治也老公祖居之以惇一臨之以清嚴民風吏習肅然丕變師帥之議洵無愧焉業已書上上

乾坤正氣集

卷三百二十

臺

考恐不能久借寇君然商羊肆虐之餘兩粟無計轉漕益迫而繼瑞復挾其重以前此遺脂挺而走險亂可翹足待也老公祖調甘劑苦莫難此時東南半壁之憂以累老公祖矣高明何以計之

答何大瀛

諱應瑞

儆郡向借福星民飲其和熙熙如也士澤于道彬彬如也觀於大射人有尙功尙德之恩焉以此知老公祖衡文之政中土丕變矣數十年後猶將歌咏作人之澤況雲漢昭回之日乎不佞一覲台光每懷大雅翰貶之辱敢不心佩

答黃行其

外吏之難非官于外者不知也李官之難非久于李者不知也台丈以才以識當事者倚重尤殷則其難定倍于弟然難盡而易者至矣都中江海波濤倏忽百變弟力觸兇鋒遽蘆一官尙未卽掛

冠猶能矢竭三寸舌以揚芳譽也

答董景越

粵雖辟壤然西南夷動靜之咽喉也從來治民多良吏而治夷者獨首班定遠寬猛操縱之間非深心淵識誰能妙運況當此土酋跳梁滇黔蜀騷敝之會乎台臺才而本之以誠識而濟之以膽將安粵以安西南半壁反側者將望風稽顙焉側聽鴻聲書之竹帛

答梁樹宇

諱建廷

年丈天剛異才瓊芝卓品黃堂奏最中土風清昔漢詔二千石以政平訟理爲安民之要今民之不安政之不平也况藩屏之地均調實難年丈剛柔妙運爲民大父母甯復河南南陽之不可問乎

答王元珠

粵西僻在天末法網濶疎聞猺獠蠢而頑然畏漢官法甚其不肖

乾坤正氣集

卷三百二十

美

有司家奴胥吏雜出而蠶食之若得廉吏則易安也台臺清霜所拂人人易腸田泗且懾威帖息獨黔禍方始不免紛騷披髮大費區畫耳何武老之遷聞非其志然二三同志者舌力止此將需次樞曹台臺晤間善慰存之同鄉主盟寥落已甚日望台臺竣事而入若嘉會之及殊爲慙悚絮語陳謝亦附于同好之意也

答趙

諱天錫

國計匱調宏羊不勝烹也當此而言寬商幾于塵飯土羹然清其源釐其蠹仁人之手每有上下兼利之法而地方旁撓則又在執持之力耳年臺合數長以握籌人稱利津國無虧額此真救時妙才也無憂匱調矣

答饒業明

台臺竣節宏猷厥歷中外鬱然建牙之望矣粵民不靖自有任其

責者公論昭明飛波已息拂袖還山介不可奪難進易退風操迥然不佞嘗謂行藏大節甯處其後可以留而去者不失爲高標不可不去而留者不免爲戀位此一行也公論所以益明而台望所以愈隆也出山之期屈指計之矣

答莫元洲

諱清

地方數厄洪水虐之而老父母造化之手拯救沉淵仁心所喻民不知災雖卓譽久飛卽在異等之擢猶得微半替之靈造命災黎則眞非望之喜也改折一議費盡筆舌幾于坐爲罪案今以全災徼浩蕩可少慰仁人如傷之思若敝邑無天徒有向隅之泣耳國是紛紜顛望主持豈弟父母每爲歌詠不置無俟台命也

答朱上愚

諱光祚河道總督

治兵治水宇宙間兩大事神聖之所經營豪傑之所馳騫盡此矣
乾坤正氣集 卷三百二十

毛

非有絕人之才入微之機則不可以得志矧禁旅媮詭未鼓氣衰而一經台臺整挈如李臨淮旌旗壁壘一新也以此偉畧出而視河雖沉州潰堤勢方孔亟知河伯效靈不煩壁馬之沉矣黃流旣平措中原于衽席不肖輩俱可安枕沐如天之庇甚大當執筆以俟用紀明德

答楊兵馬

司城之難百倍外吏法易詭權易撓奸又不易剔也終歲而壁無玷焉如臺下者指不再屈不佞卽旁局乎然廉聞精采時口芳譽若以守法爲忤俗則不忤俗庸能守法也歲計之役無須介慮

答孫蘭晚

諱森

弟閱人多矣見吏才之敏妙脫手彈丸者莫台翁若也在江以目在粵以耳兩地政績可謂入於精微使人意動而精消惜郡司馬

之擢未遂所期耳然才局所恢運以深心而一根極于實地則真無前之業竊願拭目以觀超簡者也

答林二府

向有一函奉候并鳴感佩之懷承台教倦倦莫悉尊旨每念敝邑凋疲之極不勝科擾之煩譬如久病嬰兒奪其父母啼號雖切漠無動念而仁人君子從鄰舍來撫摩過于己出喘息漸蘇方知有生之樂其如鄰翁之不得久處何也然敝鄉之民沐甘雨和風之賜從此支持綿力皆戴德之年凡可為老公祖芻五稜之歌者家嚴已命之不敢忘也

答儲文曙 諱顯祚

襄陽宿號劇郡兼以征兵轉餉之餘楚地驛驛殆遍守土者倍費拮据即功令忽嚴而平定安集哀鴻可念其未可以鷹鷂易鸞鳳

乾坤正氣集 卷三百二十

夷

也老年丈茹蘖為味運斤成風卓然治平第一至于以完糧作欠額豈可帑之別那抑部冊之混亂乎當事者知行法而不知核實錯謬種種每為人笑了不足以損吳公治行直別白之可矣

答沈愚公 諱匡濟

居高者難如水之心御劇者難迎刃之手兼此兩長指不多屈台丈何其裕如也越俗好波而聲亮所至莫不往往交相凌軋錢塘固首邑將以表率諸長令而弭其心目其難其慎倍于他邑台丈得無深思而却顧乎民瘼國是端有厚賴詎止榮施梓里竊願附古人諤諤之義也

答宋文希

老父母親民如子治虞如家幽隱之情朗然畢炤人盡託衽席之安也民之無天忽剋福曜豈弟君子之歌方與琴水同韻某托在

棠陰久沾湛露瞻歎之懷實倍倫等輿人之頌豈敢後焉辱翰施
遠及殊發其愧素絲附獻聊代生芻伏惟節哀珍重

答畢白陽

諱白巖

恭惟台臺文武壯猷勳勞懋著共仰中朝柱石冠冕天曹屬以津
門之鎖鑰無人榆關之轉輸不易暫借斗望用展鴻謨從前虛耗
之弊止因兵冗而餉糜卽今對症之方不過清兵以核餉故欲省
餉先練兵兵練而老弱者汰詭冒者清若欲省兵又不如省將一
將之費可以養無數之兵台臺酌盈濟虛守經通變幾于點鐵量
沙之妙而九天九地之神幾足食足兵之全用則未易仰窺淵涵
萬一今茲額手以觀爲國家根本得人慶又爲神京緩急有賴喜
也台臺其終懋之某迂愚無所知識獨有好德之思耿耿不寐况
辱在世譜之末乎拱聽履之入矣

乾坤正氣集

卷三百一十

堯

答王敬齋

諱治浙江撫院

爲海內名藩山川之秀麗民物之豐阜從來名公鉅卿康濟之
區也台臺以干尋正氣萬斛宏猷賜履于茲聿新治象乃不肖私
竊計憂不在民而在兵兵不盜而獷難馴民卽盜而駭易敗也台
臺妙運從心樞機坐握無不入人心惑使之意動神消者方今宇
內多故安危之計實在方叔壯猷矧時情翻覆非深心定力如台
臺又誰爲主持以扶陽德而消黨禍哉

答祁西岩

諱逢吉

子瞻爲養生說曰安日和養生之方通于治民長令號民父母凡
以安之而已故曰政在養人夫心和氣和而民之和應之此循良
之上理也讀來教琴絲就緒漸覺安和只此二言已該政譜理煩
御劇無非是物民之疾痛痾瘻不勝調如父母之心恬意盡拊摩

赤子而不厭卽理天下可也何獨一邑哉循聲正茂前路方遙尙勉終之以需峻擢將世道有寄梓未分光矣

答閔非臺

造物者因此一方民商羊爲虐而特予之仁人以拯救之譬如赤子有慈母之依雖切膚之痛不難去也崑之微德于造物者厚矣老父母出眞實心爲地方造命撫如傷之民振久弛之法遂使豪猾斂手士庶興歌餘波所潤敝邑如在懷保豈獨弟分蘭譜之光逢人讚歎其何能已若治術之妙雖欲再效千慮之一亦不過無倦一言止矣老父母倘訝其饒舌乎

答申元渚

時事多艱急才實甚老年翁深心卓識未竟其施天之所篤忌者不能掩也矧牽引舊案時有乘除固知多口之無傷而今已溫綸乾坤正氣集卷三百二十

李

答徐未孩

敝鄉方在水底而當事者視爲不竭之藏呼號之聲當以嘻笑誰復有惻然哀憐者乎老父母出眞實心爲地方造命哀此災黎至甘居催科之拙夫今天下之所乏者非巧也吏愈巧而民愈困地方何賴焉外謝其華而中澗其赤如慈母于子疾痛之與分燥濕之與共惟拙故誠也老父母勉操斯志卽古循良上理何以加焉

答練任鴻

諱國事巡漕

漕事日難費盡老公祖心血其冰之早合則天也至敝鄉巨浸仰藉仁人拯援之力雖輪將竭屢調苦爲甘敢忘如天大德今幸台

車咫尺矣根本之憂內外交迫老公祖以爲民者爲國何以挽回
氣數而消朋黨之禍哉弟顛愚觸忌耽耽在前亟思引避豐草長
林老公祖何以教我

答徐月賓公祖

民生不辰遭此巨浸而急粟者緩民聊以三分之一塞其啼呼耳
老公祖下車幾何時昌言請命至再至三若父母之于子拯之沉
溺之中卽濡首不顧也仁人之言聞者隕涕民雖轉于溝壑死無
所恨況徼從寬議折之旨哉雷霆四出至以地方虎冠摧奪我賢
撫從此織璫肆其虐賦斂吸其脂加以正官半缺署事者如秦越
人之肥瘠敲剝以應功令春夏之交二麥無望饑民嗷嗷盜賊公
行衙虎四出三吳之爲亂藪可翹足待也老公祖以一身獨肩其
重控訴環繞于側調劑倍費苦心此誠一時之難以爲老公祖累
乾坤正氣集卷三言三

奎

奈何目前急着在得賢令大疏已及此矣倘可與喻老公祖商之
上江小邑有年高才練者爲敝邑這命乎切膚之計迫于望歲惟
台慈裁察

答余星子

斗大寒城久淹驥足門下了不生厭薄想畢竭心力以治之耶有
瞿塘灑預得不化爲平瀾順流哉勞苦已深賢聲久播無煩意外
之慮也不佞迂顛觸忌行圖友麋鹿之羣然并州故人關心自切
可效齒牙者視機緣何若耳

答高來玉

璫燄方熾正氣孤危所賴翁臺領袖羣賢生色朝宁忽聞居廬之
戚相知共爲黯然沉辱在聲氣之餘薰澤尤切者乎久無便郵闕
焉生芻之奠茲以水患剝膚上履軫念情至語迫不減鄭俠之圖

也業與霞城年兄筆舌交爭收折已有端緒卽主計者齷齪相難要之期於必得共此一方有輕重無緩急只候勘疏一到惟力是視耳議局忽新忽故忽靜忽囂總如波浪層層翁臺虛中觀之其何以教我素絲毫敢告尊先翁靈几伏惟炤入

答傅元軒

老公祖以折檻之忠奮請纓之志當黔危累卵慷慨致身向使廟堂早借韓范豈至有大方之敗哉事機旣誤急乃需才而老公祖冒險疾馳邊疆生色誅逆定變壁壘一新夫濟之以沉握之以算前撫一儒一莽皆前車也誅首惡而輯其餘老公祖饒爲之矣翹首捷音以日爲歲

答孫咸若

高陽老師四令即

累臣之釋人各有心不敢言也人各有偏至之心不能持平等之乾坤正氣集

卷三百下

奎

言也老師發所未發宜乎其或駭焉然爲國守法存此議論可耳而別有心者致煩其口見之每爲三歎敘防疏中固有人所大不喜者老師略一敘及而人以爲必用之此其所以紛紛也然不知者十之三知者十之七且度外置之耳三年勞苦危疆晏然人情安則忘危書生舌長見短千古同然徐當自定但聞老師有進取之議似又宜慎重也有便郵乎弟將附一候問之牘幸示之天才偶屈甚爲快悵遇合有時正宜沉詣以需并此奉慰

答葉震孩

諱有聲福清令

每念年丈品望應在木天乃屈之簿書殊非其格然天下國家之事盡在宰百里之中從此練習隨方遊刃入而慷慨言天下大政未有不親切有味鑿鑿可見施行者也閩中之頌政績者推爲一時翹楚同心之助日盼望之弟附兄弟之好竊分蘭臭自不敢後

彈冠之誼也

答吳元垣

諱尚默四川按院

蜀事難於始尤難於終也始如奕家劫勢着着緊殺其勝敗之數乃在收局一着失算此局全輸矣奢酋狡伏我以靜勝以穩勝蓄力布謀惟先惟密年臺沉毅之力定優爲之察吏安民又無須贊矣

答張澹若

諱履端東鹿令

年兄聲實並茂俄當高議青瑄之班矣此遽廬一宿乃爲拮据播遷支持版築只此一片眞實心天下事何所不可爲力持清議百折不回從此預卜而他日姓字與雉堞俱高亦一不朽之業也爾時正如貧家作苦安得餘粒及人大惠不已多乎

答宋一衷

年臺以清風白日炤臨一方墨吏解綬去矣懸鏡之下心膽俱動

乾坤正氣集

卷三百一十

奎

豈復有怙而漏于網者而俟旁觀之采摭也兩耳如塞無可以報獨廷議日紛正氣雖旺而時有飄蕩吹激之患安得年臺早至出鐵筆玉尺以定之哉

答胡浮冶

楓葉蕭蕭戍樓高處年仁兄談笑而爭口氛禪家有以噴喜作佛事者知指麾之下喜動三軍生氣十倍矣仁兄得毋爲之一笑乎長安光景日新日異眞以杜門卻掃爲上着耳每欲於攢眉相向處更覓歡喜佛也白岳年兄聞尙滯蜀中仲雪亦久無聞問矣報代之牘不敢復報相思耿耿引睇宣雲

